

W 10



— 100  
angeb. = 00

DT 156

1610

Höfner

100/8  
100/8

Gepprüft. Politisch unbedenklich

Vertig. v. 6. 8. 1948

~~A. III 16~~

A I 77


~~L. L. II 59~~

Gebrüder Schmidt  
Bücherei  
Weferlingen

Bücherei

Zug-Nr.

A I 77



# Bekantnus Christ

lich glaubens / Bernharten  
Heryheimers / Abgesetzten Pfardieners  
vnd schülmeisters / Christo Jesu dem Hers  
ren der herlichkeit zum preiß vnd ehren bes  
kennet / Vnd den einfaltigen gotliebenden  
Christen / so vnderricht bedürffen / suchen /  
begeren / vnd bessern nit wissen / zum bes  
richt vnd vnderweisung Christlichs glaus  
bens vnd lebens / hie trewlich auffgezeich  
net / gemeret / freuntlich mitgetheilet /  
vnd auff ein frey vrtheil aller  
gottsgelehrten gestellet.

i. Thess. v.

Den geist löschend nit auß / die Pros  
phecey verachtend nicht / Prüfend  
aber alles / vnd das gut behaltend.



*[Faint, mostly illegible text, likely bleed-through from the reverse side of the page.]*



*[Handwritten in blue ink:]*  
AB 46  
19/2



# Register alles in= halts dieses Büchlin/ vnd wa jeder articul zū finden sey.


- 1 Von Christo dem wahren Natürs  
lichen Sone Gottes / seinem ver  
sprung vnd entpfengtnus / Pa  
gina 1
- 2 Von etlichen vnderscheiden / so ein  
nem jedē (die h. schrift fruchtbar  
lich zū lesen) notwēdig zū wissen 6
- 3 Von dem vnderscheid vñ ankunfft  
des fleisches / des Ersten vnd Let  
sten Adams / Pagina 9
- 4 Das Jesus Christus ein warer men  
sch von seel vñnd leib / aber kein  
Creatur / sonder aller Creaturen  
Herz sey / 12
- 5 Was folgen würde wa Christus  
nach seiner menscheit ein Creatur  
vñnd nit sein leib (ohn abtilgung  
warer menscheit) ganz vergottet  
were / 14

- 6 Zeugnis heiliger Schrift von der  
herlichkeit Christi/ 18
- 7 Von dem Leiden Christi/ vereinigt  
ter beider Naturen unzertrenlich  
geschehen/ 21
- 8 Von dem vnterscheid des alten vñ  
newen / eusserlichen vnd innerli-  
chen Menschens/ 25
- 9 Von zweierley Wort Gottes/ vnd  
Euangelio/ 28
- 10 Von dem warē Wort Gottes/ dem  
Wort des lebens/ 29
- 11 Heilig Schrift vom waren Wort  
Gottes/ 32
- 12 Von dem eusserlichen gepredigten  
Wort vnd Euangelio/ 33
- 13 Von dem Namen vnd Ampt heiliger  
Schrift/ 35
- 14 Von der Justification / od gerecht-  
werdung des Sünders/ 37
- 15 Von dem Historischen Schrift-  
glauben/ 40
- 16 Von dem waren lebendigen heiliger  
Geists glauben/ 42
- 17 Von den gesanten Dienern des E-  
uangelions Christi/ 48
- 18 Von dem zustand der gesantē Die-  
ner/ 54



- 19 Von den selbs lauffenden Hirten  
vnd falschen Propheten/ 55
- 20 Ob auch ein vngleubiger/ das Pres-  
dig ampt seligklich verwalten  
künde/ 57
- 21 Von der Christenlichen Kirchen vnd  
ihren gliedern/ 62
- 22 Von den Sacramenten in gemein/ 67
- 23 Das die Christenliche Tauffe zwei-  
erley seye/ 69
- 24 Von dem waren Tauff im heiligen  
Geiste/ 71
- 25 Von dem Sacramentlichen Was-  
ser Tauffe/ 74
- 26 Gemeiner bericht von dem Abents-  
mal Christi / vnd brot der danck-  
sagung/ 75
- 27 Von dem verstand der wort Chris-  
ti: Daas ist mein leib/ 79
- 28 Von dem waren Abentmal Chris-  
ti / vnd speisung der Christgleu-  
bigen/ 85
- 29 Von der prüfung vñ vorbereitung  
der dischgenossen Christi/ 90
- 30 Ob Judas auch den Leichnam  
Christi im Abentmal entpfan-  
A ij

- gen / oder segent ein vngleubiger  
entpfangen möge/ 96
- 31 Von dem Stillstandt des Brots  
brechens beim Abentmal/ 102
- 32 Von den waren güten wercken vnd  
ihrer belohnung/ 108
- 33 Von den wercken Menschlicher ges  
gerechtigkeit/ 111
- 34 Vom gehorsame Gottes vnd welt  
licher Oberkeit/ 113
- 35 Vom gehorsame der Christen ge  
gen ordenlicher Oberkeit/ 115
- 36 Von der Letsten zeit / vnd bosheit  
der Menschen. 117.



Ware

Ware erkandtnus Gottes  
vnsers Himmlichen Vatters / vnd  
seines gesantē / eingebornē lieben Sons  
vnsers erlösers / Herrn vnd Heilandes  
Jhesu Christi / durch erleuchtung des  
heiligen Geists / mit Göttlichem Friden  
vnd reichem segen himmelischer göttli-  
cher gnaden vnd gaben / sey allzeit  
mit vns / vñ allen angehörig-  
en seines heiligen Na-  
mens / Amen.

### Vorrede.

**L**ieben Freundt vñ Christen /  
Nach dem der barmherzig  
gütig Gott vnd Vatter / vns  
armen sündern / ein vnauß-  
sprechliche ewigwerende freud  
vnd seligkeit / durch dz bitter leiden vñ  
sterben seines eingebornen / natürlichen  
lieben Sons / vnsers Herrn Jesu Chris-  
sti / auß lieb vñ gnaden theur erkauffe  
vnd zubereitet hat / Dargegen der tau-  
sent arglistig Satan / sich allzeit auff-  
gelehnet / vñ sonderlich jezund in diser  
A üü

letzten zeit / alle seine macht vñ list erzei-  
get / vnd noch mehr erzeigen wirt / die  
Kinder Gottes an obgemelter seligkeit /  
durch sich vñ die seinen zünerhindern /  
wie vilfeltiglich schon für augen / vnd  
jegund die letzte zeit vorhandē / in wel-  
cher (wie Christus Matt. 24. sagt) Die  
lieb in vilen erkälten vnd die vngerech-  
tigkeit ober hand nemen wirt / vil fals-  
cher Propheten kommen / vñ groß ir-  
thumb sich erheben vnd erfinden wirt /  
Deshalb hoch von nöthen / nach der  
warnung des heiligen Johannis / die  
geister wol zü prüfen / ob sie auß Gott  
seyen / Das ist / ob ire leer Gott ehlich /  
dem glaubē ehlich / den Christen tröst-  
lich / vnd der heiligen Schrifft gemä-  
ß sey / das man sich wisse vor irthum vñ  
seelen schaden zü bewaren.

Vnd dieweil nun auß Gottes ver-  
hengnis / vnserer sünden halb / vil zer-  
trennung vñ spaltung im glauben /  
vnd mancherley secten erfunden wer-  
den / da keine wie die andere glaubt vñ  
helt / vñ doch ein jede sich des herrlichen  
namens / der versamleten kirchen Chri-  
sti berümet / vnd mit ihren Sacramen-  
ten /

ten/ordnung/ vñ Kirchen übungen/ die  
recht vnd best sein wil/ mit verachtung  
der andern / vnd doch allenthalben nit  
geringer feel vnd mangel gespürt vnd  
erfundē wirt/ Bin ich zweifels one/ der  
allmechtig Gott/ hab noch vnder allen  
partheyen (so den Christenliche namens  
füren) liebe Kinder/ zñ seinem reich ges  
hörig/ die er durch sein väterliche güte/  
auch wol erhalten vnd außfüren wirt.

Deßhalb sollen bey mir vnueracht/  
sonder lieb vñ werdt gehalten werden/  
alle die (sie heissen gleich wie sie wöllen)  
die mit fleiß vnd ernst/ nach göttlicher  
warheit forschen/ vmb Gott das höch  
ste güte eifferen / ob ich schon (vñnd nit  
one merckliche ursach) mich noch keiner  
parthey/ die sich einer eusserlichen vers  
samleten Kirchen rühmet/ one beschwes  
rung meines gewissens/ anhengig zñ  
machē weisse/ oder solcher gestalt/ mich  
zñ ihnen zñ bekennen (doch in der lieb  
vnabgesondert) bis es mit der Kirchen  
Christi / auß quediger heimsüchung  
Gottes/ ein besser gestalt haben wirt/  
Gott wölle bald. Begere ich doch von  
herzen Christi meines Herrn/ vnd ein

A v

glied seiner heiligē gemein/ so allezeit im  
geist versamlet ist/ zū sein vnd zū blei-  
ben/ Mit solcher gemein/ Christum dē  
Herrn der glori/vn König aller ehren/  
zū sūchen/ zū erkennen/ ihn göttlich zū  
verehren/ vnd anzubetten/ ihme zū le-  
ben vnd zū sterben/ Auch meinen glaus-  
ben von Christo (von des wegē ich nun  
zū mehrmalen fürgestelt/ angefochten/  
auch meiner dienst entsetzt worden) hie-  
rewlich zū bekennen vnd anzūzeigen/  
Vnd sonderlich auß der ursach/ dieweil  
ich vor jaren von etlichen mißgundern  
der warheit außgeschryen/ verleumb-  
det/ vnd eines vnrechten glaubens ver-  
dacht gemacht worden/ Dargegen ich  
ein Büchlin in reinē gestelt/ Safftacht  
Büchlin genant/ zur ableinung des vn-  
rechtē verdachts/ in druck verfertiget/  
welches aber auch bey den feindē Chris-  
tenlicher warheit/ wenig platz fundē/  
vnd ohn widerlegung/ von ihnen vast  
getadelt/ mit vil schmelichen namen bes-  
legt worden/ Welches auch etlich der  
reinen halb (dadurch nit alles so Clar  
vnd deutlich/ wie sunst im Schrifften  
vorzutragen) nit verstou/ oder villeicht  
auß

auß anderem vngunst nit verston wol-  
len/nach dem aber der glaub nit jeders  
mans ding 2. Tess 2. Vñ der Natürlich  
mensch die ding nit verstat die Gottes  
seind 1. Cor. 2. Darumb Christus seinen  
Jüngern sagt/ Buch ist gegeben zuuer-  
ston die geheimnis vom Reich Gottes  
dieser aber nit Matth. 13.

Darumb vñ dieweil man zu solchen  
hendeln von Gott geleert sein muß Jo-  
han. 6. Von dem auch obenherab alle  
gütern Gaben komen Jac. 1. So laß sichs  
niemand wunder nemen/ das noch vil  
dieses vñ anders/ so zum preiß Christi/  
vñ offenbarung seines reichs/ vñ göt-  
lichen willens geschrieben/ nit verston  
künden/vñ dissem schwer/ shenem dun-  
ckel/dem dritten vnuerstendig/dem vier-  
erden irrig/ Ja einem jeden nach dem  
er gesinet geurtheilt werden muß/ 20.

Damit dan niemand billiche vrsach  
hette vber mich zu klagen/ oder einigen  
Widerstandt auß meinen vorigen  
auch jezigen schriften zu nemen/ Hab  
ich meines geringen vermögens/ diese  
Bekantnuß/ zu fürderung der warheit  
vñ erklärung der fürnemsten puncten  
vñ

vnd Artickel des vorigen Büchlinß ge-  
stelt/damit jederman (was mein glaub  
vnd gesinnen were) mich hieraus dester  
besser züuerston vñ züuernemen hette/  
Doch mir vorzübehalten/dise meine be-  
kannuß/zü besseren/zü meren/vñ in al-  
len puncten züerklären / wie es die not  
surfft erfordern vñ erheischē wurd /ic.

Der allmechtig gütig Gott vñ Vatter  
durch Jesum Christum in heiligen  
Geist/wolle vnseren verstandt erleuch-  
ten/vns vor irthumb behüten/in rech-  
te erkantnis sein selbs / vnd in alle war-  
heit leithen / Das wir eines glaubens/  
sinnes/willens/vñ wissens werden/der  
da gerichtet sey / nach Jesu Christo  
vnserem Herzen. Dem sey sampt sei-  
nem himelischen Vatter / vnd dem h.  
Geist lob Preiß/ Ehr vñ danck in ewig-  
keit / Amen.

Vnd damit ich aber meniglichem in  
einer Summa anzeige / was mein glaub  
sey / davon ich hernacher mit Gottes  
hilff/vnderchiedlich in schriften bekem-  
nen wille / So bekem̄n glaub vñ halt ich/  
Erstlich die heilige Dreyfaltigkeit/  
Namlich das Gott Vatter Sohn vnd  
heiliger



heiliger Geist/drey selbsstendige vnder  
schiedliche personen vnd Namen/doch  
nur Ein/ Einiger warer Ewiger All  
mechtiger Gott/von gleichem gewalt/  
trafft / macht vnd Ehren / vnd ein  
Göttlich wesen sey.

Item die zwölff Articul vnser heis  
ligen Christenlichen Apostolischen  
Glaubens.

Item die alten Symbola fidei/ als  
die Bekantnuß des glaubens Athanas  
si / Auch des Nicenischen Concilij vnd  
alles was die Christenliche Kirch / nie  
grunde vnd zeugnis der H. Schrift/  
( Nach dem Sinn Christi außgelegt )  
geglaubt hat / vnd noch glaubet vnd  
haltet / Begere auch ( wa mir nie besa  
fers / mit grunde heiliger Schrift. dar  
gehon würdt ) mit der hilffe Gottes /  
beharrlich dabey / bis an das ende mei  
nes lebens zu bleiben / guter hoffnung  
auß genaden durch Christum

die Ewige Seligkeit zu  
erlangen.

✠

Item

**Zum ersten / von**  
**Christo dem waren natür-**  
**lichen Sone Gottes / seinem vrsprung**  
**vnd entpfengtnus.**

**I**ch glaub halt vnd  
betene / mit der heiligen Chri-  
stenlichen kirchē: Wie Jesus  
Christus der ewig Son vnd  
Wort Gottes / auß Gott seinem himē-  
lischen Vatter / von ewigkeit her gebor-  
ren / das Er auch also / in der zeit / mit  
vnd auß der reinen / heiligen / hochbe-  
gnadeten Jungfrawē Maria / die ihn  
durch die verwaltung der krafft Got-  
tes / oben herab vom heiligē Geist ent-  
pfangen / warer Gott vnd Mensch ge-  
boren sey. Der für vnserē sünd / am holz  
des creuzes gestorben / vnd von todten  
widerum auffstanden zu vnserer ge-  
rechtigkeit / zur rechten Gottes seines  
himelischen Vatters / auch noch heut  
zu tag warer Gott vnd Mensch / von  
**zweigt**

zweien vereinigen / doch unermeng-  
ten naturen / vnd einer einigen vnzer-  
theiligen person / (namlich die andere  
person in der heiligen Dreyfaltigkeit)  
vnser etziger personer / widerbringer  
vnser heils / vnd seligmacher sey.

2 Und mich dises articlens halb bass  
zu erklären / So glaub vnd bekenne ich /  
mit zeugnis heiliger Schrift: Das  
Maria die von Gott hochbegnadete  
Jungfraw / diß Ihr kindlin / des vr-  
sprungs vnd entpfengnis halb / vom  
h. Geist entpfangen habe / Laut der  
wort des Engels zum Joseph Mat. 1.  
da er spricht: Das in jr geboren ist / das  
ist vom heiligen Geist / dan Maria die  
heilige Jungfraw / kundte nit von ihr  
selbs natürlich / auß eignen krefft  
schwanger werden / deshalb sie mit ver-  
wunderung den Engel fragt / Luc. 1.  
Wie das zügohn solte / da antwort ihr  
der Engel vnd sagt: Der heilig Geist  
wird von oben herab in dich kommen /  
vnd die krafft des höchsten wird dich  
überschatten / darumb das Heilig das  
aus



3  
aus dir gebore wirt/wirt Gottes Son  
(vnd wie auch steht ein Son des höch-  
sten) genant werden.

3  
Dise wort / dieweil sie se ausdrucks-  
lich nit anders / dann von der frucht  
des leibs Marie / des Kindlins vnd  
Wenschens Jesu Christi / mit vereinigt-  
tem Wort zünerston seind / verursachen  
nich / nach der lehr der göttlichen offens-  
barung / zwey ding an Christo zü glau-  
ben vñ zü bekennen / Erstlich : Das der  
vrsprung des Wenschens Christi / auß  
Gott seinem himmelischen Vatter sey.  
Wie den Christus im Euangelio zum  
offtermal Gott seinen Vatter vnd her  
widerumb der Vatter Christum seinen  
Son nenet. Zum andern / Dieweil das  
Kindlin Jesus die frucht des leibs Ma-  
rie von irem fleisch erzeuget / von dem  
Engel ein Son Gottes / ja des höch-  
sten genennet wirt / das herwiderumb  
recht vnd billich / Gott sein Vatter ge-  
nent werde / wie auch Maria ein Väter  
ter Gottes / als die Christum nach beide  
vereinigen

4

vereinigten naturen / Got vñ Mensch /  
Wort vnd Fleisch / in einer person gebo-  
ren / ein Wüter Gottes des ganzen  
Christi / mit warheit genent mag wer-  
den / Deshalb ich auch Christum einen  
waren Son Gottes / vñ Marie vnzer-  
trennlich bekenne.

Vnd dieweil die Christgleubige  
gen / so durch den heiligen Geist auß  
Gott geboren / Kinder Gottes seind vñ  
heissen / Joh. 1. Ja auch in der heiligen  
Schrift götter genent werde Psal. 82.  
Warum solt denn Christus auch nach  
seiner Menschheit (der doch den vorritt  
hat) nit vil mehr vñ billicher / ein Son  
Gottes genent werden / so Er von na-  
tur ist / das wir durch in / auß genaden  
werden. Wir lesen Johan. 9. von dem  
gebornen Blinden / zu dem Christus  
sprach: Glaubst du in den Son Got-  
tes, Er antwort vnd sprach: Herr wel-  
cher istts / auß das ich in ihn glaub / Je-  
sus sprach: Du hast in gesehen / vnd der  
mit dir redt der istts / Er aber sprach:  
Herr ich glaub / vnd bettet ihn an.

B

Welche zeugnis je allein vöellig genug / so man anders der H. Schrifft wil glauben geben / das Christus auch nach seiner menscheit / ein Son Gottes ist / vnd mit warheit mög genennt werden / Dawid der etlich zu diser zeit fechten / nit warhafftig zu sein / sonder allein per Communicationem idiomatum. Wer hat aber disen gebornen blinden Communicationem idiomatum gelert / wer zu fragen. Item Nathanael sagt zu Christo Johan. 1. Rabbi du bist Gottes Son / Also hat in auch Johannes der teuffer / ein Son Gottes bezeuget Johan. 1. Desgleichen Petrus einen Son des lebendigen Gottes ihnen bekant / Matt. 16. Ja der Vatter selbs / Christum sein geliebten Son genant / an dem ( er der Vatter ) ein wolgefals lens habe / vnd wir ime gehorchen sollen / Matt. 3. 17. Mar. 1.

Also hieß auch ihnen Christus widerumb seinen Vatter / Da er sprach: Vatter sey ist's möglich / so gang diser Kelch von mir / Luc. 22. Item / Wer ist's der die welt vberwindet / one der da glaubet /  
das

6

Das Jesus Gottes Son ist. 1. Johan. 5.  
Item/welcher bekennet das Jesus Got-  
tes Son ist / in dem bleibt Gott vnd er  
in Gott / 2c.

## Von etliche vndercheiden

so einem jeden (die heilig Schrifft  
fruchtbarlich zu lesen) notwen-  
dig seind zu wissen.

**E**rstlich soll güter vnderscheidt ge-  
halten werden / zwischē den beiden  
stenden Christi / dem standt der nis-  
drigheit / oder Creuzampts vnd stande  
der jezigen inhabenden herrlichkeit  
Götlichs gewalts vnd wesens / Heb. 1.  
vnd 2. Vnd welche Sprüch h. Schrifft  
von jedem standt in sonderheit lauten  
vnd geredt seind. Doch das alle werck  
beider Naturen / der gangen person  
Christi warhafftig zugeschribē werde /  
vnd in beiden stenden kein natur von  
der andern getrennt oder abgesondert /  
sonder Christus naach beiden vereinigt  
ten vnvermengten naturen / in leiden  
vnd herrlichkeit ganz bleibe.

B ii

Zum andern das güter vnderscheidē gehalten werde / zwischen dem Lusserlichen altē natürliche vnerneuten / vñ dem innerlichen newen geistlichen menschen / vñnd denen Sprüchen / so von jedem in sonderheit lauren vñd zünersstohn seind.

Zum dritten soll man vnderscheidē wissen vñd halten / zwischen dem Ewiggen wort Gottes / das Gott selbs ist / Joh. 1. Auch Ewig bleibt / 1. Pet. 1. Vñd dem schriftlichen wort / das von dem Lebendigen zeuget Johan. 5.

Zum vierdten / vñd nach dem ich mit Paulo dem geistreichē Apostel glaub / halt vñd bekēne / Einen Herrn / Glaubē / Tauff / Gott vñd Vatter vnser aller / Ephe. 4. jedoch soll man güten vñd vndercheidē haben / zwischen dem waren Lebendigen / Thetigen / H. Geists glauben / Vñd dem hystorischen dothen vnfruchtbarē Schrifte glauben / Jac. 2.

Zum fünfften also auch vnderscheidē / zwischen dem waren Tauff / Joh. 3. So von oben herab im H. Geist geschicht / durch den glauben in das vergossē



gossen blüt Christi/ 1. Joh. 1. Vnd dem  
eufferlichen Tauff / so durch den bes  
rüffnen diener/ nach dem befelch Chris  
sti im wasser geschicht / Matt. 28.

Zum Letsten ist auch grosser vnder  
scheid des waren Nachtmals Christi/  
Apoc. 3. dem Lebendigen brot Gottes  
vom himmel kommen/ der welt das les  
ben zugeben/ Joh. 6. Vnd dem Sacra  
mentlichen Nachmal/ Dem Brot des  
Herzen oder widergedechtnis vom  
Christo den glaubigen verordnet vnd  
ingefagt/ seinen doch mit danck sagung  
dabey züuerkündigen bis das er kom  
men würdt/ 1. Corinth. 11.

Vnd wa man jetz erzeelter vnder  
scheid in H. schrift mit acht/ wol weiß  
vnd versteht/ Da würdt man des rech  
ten verstandts viler Sprüch manglen  
vnd feelen müssen/ vnd schwerlich se  
ren / die Creatur vor Gott halten/ etc.  
Der Herre Christus / wolle vns durch  
seinen heiligen Geist / in rechtem ver  
standt seines Worts / vnd in alle war  
heit inleiten / Amen.

B iij

2  
Von dem vnderscheidt vnd  
ankunfft des fleischs des Ersten  
vnd Letzten Adams.

**S**As ich aber vmb der Ehren Chris-  
sti willen/denen nit züstimen kan/  
die da bekennen: Das kein vnder-  
scheidt sey zwischen der Edlesten Sees-  
len vñ aller reinisten natur/des fleischs  
Christi / vnd auch des fleischs/des ver-  
reihers Jude / sampt aller gotslosen/  
Türcken vñ Heiden fleische/verursacht  
mich/das der erste Adam/von der Er-  
den irdisch / gemacht vnd geschaffen/  
Gott nit zü einem Vater/sonder allein  
zü einem Schöpffer gehabt/vnd durch  
die vbertrettung des gebotts Gottes/  
die sünd vber sich/vñ alle seines fleischs  
nachkömmling eingefüret hat / Deshalb  
auch der Maledeyung vnd verweisung  
vnderworffen gewesen.

Vnd aber der ander Adam Chris-  
tus/ein Newer heiliger Mensch/Luc.  
1. Der Herz vom himel. 1. Corinth. 15.  
Der nit von diser welt/sonder von oben  
herab Johan. 8. Vom H. Geist vber  
natürlich

natürlich entpfangen / Gott zu einens  
 Vatter / vnd nit zu einem schöpffer ges  
 habt / vnd heiliglich von einer reinen/  
 hochbegnadeten/gebenedeyten Jungf  
 frauen geboren / Welche als ein glaus  
 bige H. tochter der glaubigen vätter/  
 zūvor vnd ehe sie Christum/vom heilic  
 gen Geist entpfangen/von Gott erneu  
 wert wider geboren / hochbegnadet/er  
 leucht / geheiligt vnd gebenedeyet ge  
 wesen.

Darumb wir sein heiligs fleisch / on  
 alle sünd/mackel vnd befleckung bekens  
 nen/der auch vil vff ein ander weiß Da  
 uids vnd Abrahams Son / weder  
 Isaac vnd Salomon gewesen / Dann  
 in seiner Entpfengtnus/hat nit geherz  
 schet die begird des sündlichen fleisches/  
 sonder genad / glaub vnd geist/darum  
 singt man: Durch den H. geist im glaus  
 ben/ist er warer Mensch geboren.

Vñ wiewol Christus der Substanz  
 vnd natur halb/ein warer mensch/von  
 leib / fleisch vñ blüt gewesen/auch noch  
 ist vnd Ewiglich bleibt / ja in gleich  
 nis der Menschen Philip. 2. Vnd

B iß

gleichheit des sündelichē fleischs erschienen/noch ist grosser vnderscheidt/ zwischen seinem aller heiligsten reinen gebenedeiten fleisch/ vnd anderem gemeinen alten unreinen Adamischē fleisch/ oder fleisch der sünden.

Dann sein fleisch ist ein fleisch der verheissung/gnaden vnd gerechtigkeit ja des Eingebornen Sones Gottes gewesen/ein heilig new fleisch vom heilgē Geist empfangen/ vnd einer reinen gebenedeiten Jungkfröwlichen Mütter/ (die von den gläubigen vätern herkommen) heiliglich vnd vber natürlich geboren/ darumb nit allein heiliger vnd besser/ dann vnser unrein fleisch so in sünden vnd bösem lust empfangen/ vñ geboren Psal. 50. Vnd von vnden heer von der erden irdisch/ Joh. 8. 1. Corin. 15. Sonder auch seines vrsprungs vnd herkömens halb vil besser/dan Adams fleisch auch vor dem fall gewesen / ich geschweig des Türcken oder der Heidē fleisch / welches etlich dem h. fleisch Christi vergleichen wollen / so doch nit geschriben stet dz er des Türcken natur/ sonder

12

sonder den Samen Abrahe an sich  
genommen habe/ Heb. 2. Vnd danoch  
auch nit in Ißmael/ sonder in Isaac  
der Sam genennet werden solte.

Christus ist auß den glaubigen vātē  
tern heertōmen vnd nit vom Türcken/  
sonst müste Christus auch ein sūnder/  
vnd des Türcken brüder sein / das ein  
Christ noch lang nit glauben wurde/  
Dan Christus ist nit von der welt/ sons  
der von obenherab Joh. 8. Er ist für  
vns zur sūnd gemacht/ der doch nie sūn  
der ward/ in des munde nie kein betrug  
erfunden wordē 1. Pet. 2. Vnd zū einem  
lebendigen Geist worden / so der erst  
Adam nur zū einer lebendigen Seele  
gemacht gewesen 1. Corinth. 15.

Darumb es von vnserem fleisch ge  
redt vnd gesagt ist/ Alle menschen seind  
lugner Psal. 1. vnd 15. Item/ alles fleisch  
wie gras 1. Pet. 1. Item/ das fleisch ges  
lustet wider den Geist Gala. 5. Item  
auß staub bist du wordē/ zū staub must  
du widerumb werden Gene. 3. Aber  
vnder jez erzelte Sprüch 11. Schrifte  
mag dz heilig fleisch Christi/ mit nichtē

B v

gerechnet werden / sonder vnder nachfolgende Sprüch. Diser ist mein geliebter Son an dem ich ein gefallen habeden solt jr hören Matth. 3. 17. Mar. 1. Vnd du wirst nie zügebē das dein heiliger die verwesung sehe Acto. 13. Psal. 25. Item das er sey das Liecht der welt Johan. 8. Die vfferstehung die warheit vnd das Leben Johan. 14.

**D**as Ihesus Christus ein warer Mensch / von Seel vnd Leib / aber kein Creatur / Sonder aller Creaturen Herz sey.

**I**ch kan auch Ihesum Christum (den ich mit dem h. Apostel Thoma / für meinen Herrn vnd Gott erkenne vnd bekenne) Als wenig nach seinem ersten standt / vnd Creutzampft / als jezundt in der Gloria seines Vaters / für ein Creatur halten / wie etlich mit leren vnd schreiben thon / vnd geschon haben / dieweil alle Creaturen der eytelkeit vnderworffen sein Rom. 8. Vñ wie

wie Ambrosius sagt: wädelbar / knechtlich / dienstbar vnd vnderthon ihrem Schöpffer / vnder Gott vnd Gottes werck seind / die Gott anbetten / vnd seinem gericht vnderworffen sein müssen.

Christus aber angebetet wurde / auch von allen Englen Gottes / welches keiner Creatur gebüret / vnd abgötterey were ein Creatur anzubetten.

Es ist auch Christus nit allein dem gericht nit vnderworffen / Sonder selbs Richter der lebendigen vnd Todten Acto. 10. Solt dann auß dem heiligen Geist auch mögen ein Creatur empfangen werden / Oder ein Jungkfraw ein Creatur geben mögen / vnd für vnd noch ein Jungkfraw bleiben / steht zu bedencken.

**Was folgē wurde wa Christus**  
 nach seiner Menschheit ein Creatur / vnd nit sein Leib (ohn abtödtung warer Menschheit) gang vergottet were.

**Wenn**

**W**enn Christus ein Creatur were/  
 möchte er nit sein die andere pers  
 son in der H. Dryfaltigkeit/ das  
 von auch Augustinus spricht/ das in  
 der H. Dreyfaltigkeit/ nichts geschaf  
 fens nach dienstbars sey / nichts un  
 gleichs/ nichts vor od noch/mehr oder  
 minder nichts außwendigs/ oder dem  
 andern vnderdienstlich / ic.

Das aber Christus die andere pers  
 son sey in der H. Dryfaltigkeit/schreibt  
 auch erstgemelter Augustinus sprechē  
 de/welcher recht glaubig ist/der glaubt  
 in Christo ein ware Menschliche natur  
 vñ das die selbige/ durch die vffnemūg  
 Gottes des worts/also sey erhöhet/ vff  
 das der sie hat angenōmen/ vñnd das  
 was er angenōmen/ein person in der h.  
 Dryfaltigkeit were / dazū stīmet auch  
 vnser Christlicher glaube/nālich dz der  
 Christus so vō H. Geist entpfangē/ auß  
 Maria geborē/ gelitten/gestorben/ bes  
 grabē/ vfferstāden zū himel gefarē/ das  
 eben diser Christus/ zur gerechtē seines  
 himelischen vatters sige/ vñd künfftig/  
 lebendige vñd todten richten werde.

Nach



Nach dem aber etlich irrig halten/  
 vnd sagen/ Wann man Christum nach  
 seiner Menschheit / nit laß ein Creatur/  
 ja vnser fleisch vnd blüts brüder sein/  
 So sey den Christen aller trost vñ hoff-  
 nung entnommen / die billicher solten  
 das widerspiel drauß schliessen / Nam-  
 lich so er ein Creatur were / das er vns  
 eben deshalb nit helfen künthe / noch  
 zur gerechtwerdüg vns nutz sein möch-  
 te / dann er künde nit sein das haupt  
 der gemein / noch der ware Weinstock/  
 den h. Geist sampt seinen Gaben in seine  
 glider inzüfliessen / Auch künde er des-  
 halb / weder hoher Priester / noch vnser  
 mittel sein / wir darfften auch nit in sei-  
 nen Namen hoffen / noch in anbetten.

Vnd wie künde er vnser noch vñ an-  
 ligen erkennen / hören oder fürzütrage  
 wissen / das Göttlich wesen vnd natur  
 vns mittheilen / in vnseren hertzen wo-  
 nen / Wann er noch seibs ein Creatur/  
 in Creaturischem wesen / vnd reumlich  
 vmbschrieben were / dann the sollich  
 obgemelt keiner Creatur möglich / noch  
 züstendig / Darum zu vnserer geneesen/  
 hilff

hilff/heil vnd Seligkeit/ noch von nö-  
 then/ das Christus kein Creatur/ son-  
 der inn einer Person warer Mensch/  
 vnd auch ein allwissender allmechtiger  
 Gott sey/ der all vnser bitten/ ruffen/  
 schreien erhören/ wissen vnd auch helf-  
 fen künde/ etc.

Vnd wa die Christglaubigen / sich  
 solcher sach erinnern / wissen vnd von  
 hertzen glauben/ das sie namlich einen  
 solchen Herrn / ja Brüder im himmel  
 haben / der in allem himmelischen ge-  
 walt/ vermögen reich vnd Regiment  
 sizet / der gleicher Gott mit dem Vats-  
 ter ist/ vnd alles (vnser Seel vnd Leib  
 belangen) züerwalten vnd zügeben  
 hat / Auch so Barmhertzig gütig mil-  
 vnd freundlich ist/ das er es gern thun  
 wille/ vnd vil milder ist zü geben/ dann  
 wir mit dancksagung von seiner milt-  
 handt züentpfangen / das sag ich / er-  
 frewet einem bekümmerten Christglaub-  
 igen Menschen / sein gewissen / sinn/  
 hertz vnd gemüth/ An Gott nie züer-  
 zagen / sonder mit gutem vertrauen  
 vnd

vnd starcker hoffnung / in allem anli-  
gen zūflucht zū ihme zū haben / sich der  
Barmhertzigkeit Gottes zūertrösten.

Dann ein jede Lehr / die in warheit  
Christlich genennet solle werden / bestat  
fürnemlich in vier stucken / erstlich das  
sie Christo ehrlich sey / Zum andern  
dem Glauben ehlich. Zum dritten  
den Christen tröstlich. Zum vierdten  
der heiligen Schrifft gemöß / so ist aber  
obgemelte Lehr von der Creatur Chri-  
sti keinem theil ehrlich / erschließlich  
noch dienstlich.

Darumb alle zungen bekennen sol-  
len wie zum Philip. am 2. steht / das  
dieser Ihesus Christus (Dem ein Nam  
vber alle namen gegeben ist / inn wels-  
chem Namen sich alle knye / der hims-  
meltischen irrdischen vnd hellischen bies-  
gen sollen) das er der Herr seye / zum  
preiß Gottes des Vatters /c.

**Zeugnuß heiliger Schriffe**  
von der Herrlichkeit Christi / keiner  
Creatur zūstendig.

Vnd

<sup>12</sup>  
**W**ird dieweil Christus mein Herr  
vnd Gott/von dem H. Geist entz  
pfangen/Matt. 1. Der Herr vom  
himel 1. Cor. 15. Ein Son des höchsten  
Luc. 1. Ein Heiland der Welt Joh. 4.  
Der sein volck selig macht von iren sün  
den Matth. 1. Ein Liecht der Heiden  
Luc. 2. Der die Sünd vergeben kan/  
Luc 5. Mit dem H. Geist kan tauffen  
Mat. 3. Das ewig leben geben Joh. 10.  
Ein Herr der herrlichkeit 1. Cor 2. Der  
Brunn des lebens Apoc. 22. Der Fürst  
des fridens Esa. 9. Vnd lebens Act. 2.  
Dem aller gewalt im himmel vnd auff  
Danic. 7 erden gegeben ist Mat. 28. Des Königs  
reich kein end hat Luc 1. Apoc. 12. In  
dem alle schetz der weißheit vnd erkant  
nis verborgen ligen Col 1. In dem da  
wonet die ganze völle der gottheit leib  
lich Col. 1. Der aller hertzen kündiger  
ist Acto. 1. Seiner kirchen haupt/fun  
dament vñ eckstein Col 1. 1. Cor 3. Das  
Brot des lebens / Die Speiß der glau  
bigen Johā. 6. Dem ein namen über als  
le namen gegeben ist Phil. 2. In des na  
men sich biege sollen alle knye/der hims  
lischen/

lischen / irdischen vñ hellischen Phil. 2.  
 Der Glanz göttlicher herrlichkeit / vñd  
 ebenbild seines wesens Hebr. 1. Der da  
 siget zur rechten der Maiestet Gottes  
 Hebr. 1. Der warhafftiger Gott vñd  
 ewigs leben ist. Joh. 5. Ein Herz über  
 alles / diser vñd der zukünfftigen welt  
 Ephe. 1.

Darumb ich glaub vñnd halte / das  
 sein leib vñd seel / blüt vñd fleisch / nit al  
 lein in Gott auffgenommen / zu Himel  
 gestigē / sonder über alle himel erhöcht /  
 im leben / wesen vñ in der völle Gottes  
 sey vñd wone / vñd die völle Gottes in  
 ihme / das Er alles erfülle Ephe. 4. Ja  
 warer Gott vñ Mensch / ein Herz vñd  
 König des himels vñd aller herrlichkeit  
 Gottes sey / des gewalt ewig ist / der vff  
 dem thron vñd stül Gottes herschet vñ  
 regiert / auch nach seinem fleische / in al  
 ler macht / krafft vñnd herrlichkeit der  
 Maiestet Gottes Psalm 103. Hebre. 1.  
 Apoc. 3. Der auch den himel vñnd alle  
 himelische gaben / mit vollkomner glo  
 rien / vñd Göttlicher herrlichkeit / allem  
 andern fleisch / seinen glidern den gleu

C

bigen/durch den h. Geist reichlich auß  
 spende/schencck vnd mittheile/ Deshalb  
 ich disen Ihesum Christum / mit dem  
 Apostel Thoma / für meinen Gott vnd  
 Herren / auch nach seiner Menschheit/  
 vnd für kein Creatur / sonder für den  
 Herren aller Creaturen / erken / glaub/  
 halt vnd bekenne. Dafür in dann auch  
 der h. Apostel Paulus gehalten / laut  
 der erzehlung seines berüffs / in der Epis  
 stel zum Galatern Cap. i.

## Von dem Leiden Christi/ der Erlösung Menschlich geschlechtes.

**N**ach dem zu vnseren zeiten / auch  
 etlich erfunden werden / so die zwo  
 vereinigten naturen / der einigen  
 person Christi / im Leiden / wie auch in  
 der herzlicheit trennen wollen / vñ Gott  
 in Christo / vom leiden vnserer erlösung  
 absonderen / wie auch den Menschen  
 Christum von dem wesen Göttlicher  
 hertz

herlichkeit/ vñ der leer des heiligen Jo<sup>h</sup>  
hannis zñ wider / Christum aufflöset  
1. Johan. 4.

So glaub vnd bekenich / das Jesus  
Christus / der ware naturliche Son  
Gottes / der Held von zweien naturen /  
warer Gott vnd Mensch / in einer per-  
son / der gang Christus (also zñ reden)  
vns am holtz des Creuzes / durch sein  
eigen blüt erkauft vnd erlöset habe /  
vnd ein völligs opffer für die sünde der  
ganzen welt worden sey 1. Joh 2. Dan  
te der Herz der herlichkeit / vñ Fürst des  
lebens / für vns gecreuziget ist 1. Cor. 2.  
Act. 2. Vnd wir sein durch Gottes blüt  
erworben Act. 20. Dann Gott war in  
Christo / vnd versonet die welt mit ime  
selbs 2. Cor. 5. Es hat nit allein das fell  
des Lambs / sonder das lamb Gottes  
selbs / vnd gang / vnser sünd getragen  
Joh. 1. Gott hat auß lieb / seinen einge-  
bornē Son für vns gegeben Joh. 3. Vñ  
durch sein thewres blüt / als eines vns  
schuldigen / vnbesleckten Lambs / sein  
wir erkauft 1. Pet. 1.

Das aber etlich fürbringen/ wie der vnleidenlich Gott/hab leiden vnd sterben künden: Da bekenne ich auch/das Gott abgesonderet/in seiner natur/weder leiden noch sterben künde/wie auch das Wort des Vatters abgesondert/in seiner natur/nit het leiden noch sterben künde/wa es nit menschlich natur an sich genommen/fleisch worden/vnd die zwo naturen inn einer person des Sones Gottes/vereiniget gewesen weren/darum̄ ist Gott Mensch/dz Wort Fleisch worden/das Gott im fleisch leiden vnd Menschlichs geschlecht erlösen möchte/ꝛc.

Vñ wie Gott hat künden ein mensch vnd geboren werden/ also hat Er auch nach der person des Sones/ leiden vnd sterben künden. Es haben auch die lieben Martyrer gelitten/vnd sein vñ Christus willen gestorben/da die ganz person im leiden gestanden/vnd den noch one tödrung der seelen/ steht auch zübedencken.

Vnd wa der heilig Apostel Paulus/  
nur auff die eine natur im leiden Christi  
gesi



sti gesehen hette/was hette er es denn so  
 hoch erheben vnd preisen dürffen/da er  
 sagt: Christus ist gestorben für vnser  
 sund/nach der Schrifft 1. Cor. 15. Dies  
 weil doch sonst auch alle menschē sterb-  
 lich sein / wa nit hie ein geheimnis we-  
 re gewesen / dē Herrn der herrlichkeit bes-  
 langend / Aber es ist dz wort des Creu-  
 zes den Juden ein ergernis / den Grie-  
 chen ein thorheit / wie der H. Apostel  
 sagt 1. Cor. 1. Ja aller vernunfft ein gre-  
 wel vnd abscheuen/das der eingebor-  
 ne Son Gottes / geboren werden/leidē  
 vnd sterben solle/ allein der glaub be-  
 greiffes. Aber wie wurde vns sonst/ die  
 grosse lieb vñ vnaussprechliche demüt  
 Christi offenbar / wa sich nit die gött-  
 liche natur in Christo/dem Sone Got-  
 tes her genidriget/sich in dz fleisch zum  
 leiden begeben/vns zū erlösen/dan die  
 nidrigung wirt nit allein/der Mensch-  
 lichen natur halbē/ sonder vil mehr vñ  
 der göttlichen natur willen der person  
 Christi/ gemeldet vnd fürgebildet/das  
 Christus ganz bleibe/2c. Wils deshalb  
 also mit dē Concilio Ephesino beschlies  
 E tñ sen/

sen/da also stet/wer nit beken̄t/das das  
 Wort Gottes im fleisch hab gelitten/  
 vnd gecreuziget sey im fleische / vnd  
 den tod hab im fleisch geschmeckt / vnd  
 der erstgeborn auß den todten sey wor-  
 den/nach welchem er das leben vnd der  
 lebendig macher / als Gott ist / der sey  
 Anathema/das ist verbanner/zc.

**Folget nun weiter vom vn-  
 derscheide des alten vnd newen eus-  
 serlichen vnd innerlichen  
 Menschens.**

**E**s ist zur seligkeit nötig zu wissen/  
 das die heilig Schrift / auff zwei-  
 erley weiß / vom Menschen redet/  
 als von dē innerlichen vñ eusserlichen/  
 laut der wort 2. Cor. 4. Ob schon vnser  
 eusserlicher Mensch verweset/ so wirdt  
 doch der innerliche von tag zu tag er-  
 neweret/Also sagt auch die h. Schrift  
 vom alten vnd newen menschen Col 3.  
 Ziehend̄t auß den alten Menschen mit  
 seinen wercken / vnd legent den newen  
 an/ also auch vom Geistlichen vnd nat-  
 türlichen

türliche 1. Cor. 2. Der natürlich mensch  
vernimpt nichts vom geist Gottes/der  
geistlich aber richtet alles / vnd er wirt  
vō niemand gerichtet / Deshalb einem  
jeden/ nach seiner art vnd eigenschafft/  
sein zustande in heiliger Schrifft ver-  
ordnet ist / Als dem innern/newen geist-  
lichen mensche/ was nach seiner art vñ  
eigenschafft geistlich ist / dem eusseren  
alten natürlichen menschen aber / das  
jenig so nach seiner art vñ eigenschafft/  
eusserlich vnd leiblich ist/rc.

Darum̄ zweierley speiß vnd dranc /  
zweierley Wasser / Priester / Gehör/  
Wort / Euangelion / Glaub / Frid / Be-  
ruff / leben vñ todt / in heiliger Schrifft  
fürgebildet wirt / Davon zu de Hebra-  
ern am 2. 3. 4. 8. 9. 1. Timot 3. 5. Joh. 6. 8.  
1. Pet. 1. Ja 1. Eph. 1. Esa. 50. 55. 1. Joh. 5.  
Acto. 15. Denn also will von nöten sein  
zu wissen / wie die heilig Schrifft un-  
derschiedlich von jedem redet / damit  
man nit vom innern / geistlichen erne-  
werten menschen verstand / was von  
dem alten vñernewerten menschen ge-  
redt wirt.

C iij

Als da Paulus der Apostel sage  
 Rom. 7. Es wone nichts güts in seinē  
 fleisch/ vñ er befinde ein ander gesatz in  
 seinen gliedern / dem gesatz Gottes zū  
 wider / Ist nit vom innerlichen erne-  
 werten / geistlichen / sonder vom alten  
 natürlichen menschen geredt / der sich  
 geistlicher vñd göttlicher sachen vñd  
 hendel nit versteht 1. Cor. 2. Da aber  
 Paulus spricht Philip. 4. Er vermög  
 alles durch den der in mechtig mache /  
 Ist nit vom alten natürlichen / sonder  
 von dem innerlichen erneuerten / geiste-  
 lichen menschen zūuerston / der alles  
 richtet / vñd er von niemand gerichtet  
 wirt 1. Cor. 2. Dann dem glaubigen ist  
 alles möglich Mar. 9.

Also ist dem erneuerten menschen /  
 das joch Christi süß / vñ sein burd leichte  
 Matth. 11. Gottes gebot nit schwer  
 1. Johā. 5. Aber dem alten vñernewer-  
 ten natürlichen menschen, ein vnange-  
 neme / widerwillige Cost vñd speiß / Ja  
 für sein vermögē ein vntreglicher last /  
 je vñd je gewesen vñd noch. Darumb  
 welcher disen vñderscheid in h. Schrifte  
 mit

nit weist vnd helt/der wirt Kleinen nutz  
dauon bringen/ oder auch bey andern  
schaffen mit seiner leer / noch den Artis  
ckel vom freie willen recht verston/oder  
ergreifen mögen.

## Von zweierley Wort Got tes vnd Euangelio Christi.

**I**ch glaub vnd bekenne auch mit  
grund heiliger Schrift/zweierley  
Wort vnd Euangelion / namlich  
ein lebendigs / selbsstendig Wort/ das  
da ewig bleibt 1. Pet. 1. Vnd Gott selbs  
ist Joh. 1. Vnd ein ewigs Euangelion  
Apoc. 14. Das Gottes krafft ist Rom. 1.  
Das Euangelion vnserer seligkeit E  
phe 1. 2c. Vnd ein eusserlich schriftlich  
wort/vñ mündeliche predig des Euan  
gelions/ von welchem vndercheid des  
waren Wortes / vnd eusserlichen gepre  
digten worts/ sagt der H. Paulus klar  
Tit. 1. sprechende: Gott hat zu seiner zeit  
offenbaret sein Wort/durch die predig/  
die mir vertraut ist / nach dem befelch  
Gottes vnseres Heilands. Item/ Col. 1.

saget er: Von der hoffnung habe ihr ge-  
hört / durch das Wort der warheit im  
Euangelio. Wie vnderscheidet er sein  
das Wort der warheit (das Christus  
selbs ist) von der predig des Euange-  
liums / danon nun weiter.

## Von dē waren Wort Got- tes / dem Wort des lebens.

**D**as war lebendige vñ ewige wort  
Gottes / ist das Wort des lebens /  
Gott selbs vnd ewig / ja es ist ge-  
mad vnd Krafft / licht / geist vñ leben /  
Christus selbs im h. Geist / der selbs vn-  
sere hertzen berüret / vmb die sünd straf-  
fet / waren rewē gibt / durch büß zu ime  
betert / mit rechtem glauben erleuchtet /  
vñd new gebieret / das hertz reiniget /  
die sünd verzeicht / from / gerecht vñd  
selig macht / Auch selbs vnseren betrüb-  
ten hertzen (dem innern menschen) den  
göttliche freiden / vñ ewige freud durch  
sein blüt erworben verkündiget / das  
wir durch ihnen dem Vatter versonet /  
die maledicung auffgehoben / darges-  
gen

gen die benedeiung vñ erbschafft Gottes  
 reichs das ewig leben erworben sey/  
 welches er alles selbs durch seine Geist  
 in vnseren hertzen prediget/vñ wir von  
 jme lernen vnd empfangen müssen.

Sollichz zü glauben vnd zü bekenn  
 nen / verursacht mich zum ersten / die  
 offenbarung Gottes / darnach auch  
 der H. Schrifft zeugnis/dann im 84.  
 Psalm nach der alten tranßlatz steht al  
 so: Ich will hören was der Herz Gott  
 in mir redet / denn Er redet frid über  
 sein volck. Item/ Joh. 6. steht: Sie wer  
 den alle von Gott gelet / wer es höret  
 von meinem Vatter vnd lernet es / der  
 Kompt zü mir/ Item/ Joh. 15. On mich  
 kündt jr nichts thun. Item/ Jac. 1. Alle  
 güte vñd volkomne gab/ Kompt oben  
 herab vom Vatter der liechter / vñd  
 Johā. 3. Der mensch kan nichts nemen/  
 es werde ihm denn von oben herab ge  
 geben. Item/ 1. Johan. 2. Wie euch die  
 salbung leert / also istz war vnd nit er  
 logen. Itē/ 1. Cor. 2. Vns aber hats Got  
 offenbaret durch seinen Geist/denn der  
 Geist erforschet alles/auch die tieffe der  
 gottheit.

Gottheit. Item/Philip. 1. Sollen sie et  
was weiter gesinnet sein/ das laßt euch  
Gott offenbaren.

Item Matt. 11. Niemand kennet den  
Vater den nur der Son/ vnd weme es  
der Son will offenbaren. Item Matt.  
16. Fleisch vnd blüt hat dir nit offenba  
ret / sonder mein himmelischer Vater.  
Also dancket auch der H. Paulus mit  
bitt zü Gott/ das inen (den Ephesern)  
der Geist der weißheit vnd offenba  
rung zü Gottes selbs erkannnis ge  
geben wurde Ephe. 1.

Deßhalb wir arme sündler/ sollich  
alles / nirgent anderswa/ dann allein  
in vnd bey Christo/ dem ewigen Wort/  
zur gerechten seines himelischen Vaters/  
da er zü finden ist Col. 3. sūchen  
vnd holen sollen/ auch selig zü werden/  
in vnseren hertzen fülen / entpfinden  
vñ versichere werden müssen / das ime  
in warheit also sey. Wer ime anders  
thüt/ der sūcht Treüblin an dornstreu  
chen/ vnd seygen an Disteln Luc. 6.  
Matth. 7. Das ist / er arbeit vergeb  
lich/ vñ wirt seiner seelen weder friden/  
trost



trost noch rüw finden. Vñ bleibt dann  
 noch der dienst vnd predig des Euang-  
 gelij sampt den Sacramenten für den  
 eusserlichen menschen onuerkleineret.  
 Allein das man güten vndercheid hal-  
 te zwischen dem ampt vnd würckung  
 Christi des Herren vnd waren hohen  
 Priesters/bey dem innerlichē mensche/  
 vnd dē ampt des dieners/oder knechts/  
 so für das fleisch vnd eusserlichen mens-  
 chen geordnet ist/damit die Ehr Chris-  
 sto dem gedeyen geber in allem allein  
 bleib vnd gegeben werde / 2c.

## Heilig schrift vom waren

Wort Gottes Hebre. 4.

**D**as Wort Gottes ist lebendig vnd  
 krefftig / vnd scherpffer denn kein  
 zweischneidig schwert / vñ durch-  
 tringer bis das da scheidet seel vnd  
 geist / auch gelenck vnd marck / vnd ein  
 Richter der gedanken / vnd sinnen des  
 hertzens / vnd ist kein Creatur vor ihme  
 vn sichtbar. Jerem. 23. Ist mein Wort  
 nit wie fiewr / vnd wie ein hamer der die  
 felsen

felsen zerschmeißt. Joha. 1. Im anfang war das Wort/ vnd das Wort war bey Gott/ vñ Gott war das Wort. Mat. 4. Der mensch lebt nit allein im brot/ sonder in einem jeden Wort / das da auß geht/ durch den mund Gottes. Esa. 55. Das Wort so auß meinem mund geht/ soll nit wider zü mir lâr kommen / sonder thun was mir gefelt/ vnd soll ihm gelingen / darzû ichs sende. Apoc. 19. Vnd sein nam heißt Gottes Wort. Joha. 8. Wer vs Gott ist/ der höret Gottes Wort.

## Von dem eusserlichen gepredigten Wort/ vnd Euangelio Christi.

**S**As eusserlich/ Mundelich/ dienstlich/ gepredigt/ schriftlich Wort/ vnd Euangelion / so durch den Diener dem eussern mensche/ durch den büchstaben fürgeragen wirt / wiewol es bey allen Christgleubigen / als ein herliche zeugtnus von Christo vnserem seligmacher / hoch vnd herlich/ ja ein

ja ein schatz über alle menschliche schatz/  
 gehalten werden solle / jedoch nit so  
 hoch / als das ewig Wort / das Gott  
 selbst ist Johan. 1. Sonder als ein zeug-  
 nus des waren ewigen Worts / dann  
 das schriftlich wort / kan für sich selbst  
 kein böß unrein herz / von sünden rei-  
 nigen / gut / from oder gerecht machen /  
 ob es schon dauon geletter wirt / Es  
 kan das leben nit geben / sonder allein  
 von dem Wort des lebens zeugen / Jos-  
 han. 5. Dann wiewol der heilig Paulus  
 spricht 2. Tim. 3. Die Schrift mach  
 weise zur seligkeit / hendt er doch gleich  
 daran vnd sagt : Durch den glauben  
 in Christo Jesu / damit er nit die schrift  
 (so wol zur seligkeit dem eusserlichen  
 menschen dienstlich) sonder den glau-  
 ben in Christum zum grund setze /c.

Wa nun die erwölten vnd gesanten  
 diener vnd zeugen Christi / als die so  
 der mitwürckung Gottes verheiffung  
 haben / solche zeugnus von Christo im  
 gang der gnaden führen / vnd die ge-  
 heimnis der manigfaltigen gnaden /  
 vnd reichthums der herrlichkeit Gottes  
 verkün-

verkündigen / Da würcket one zweifel /  
 Gott bey seinen getrewen gesanten die-  
 nern / vnd eusserlichen gehilffen vnser  
 seligkeit / durch das Wort des lebens  
 Christum selbs / im heiligen Geist / wa-  
 wie vnd wenn Er will. Welches alles  
 Er auch (nach seiner allmechtigkeit)  
 one sie gethün kane / als ein freier all-  
 mechtiger Got / der keinem eusserlichen  
 ding verbunden.

Wa aber pflanzen vnd gedeien als  
 so zusamen kompt / da wirts one frucht  
 vnd nutz der seligkeit / nit abgoht / vnd  
 ist doch der diener nichts 1. Cor. 3 Gott  
 aber alles / der das gedeien gibt / damit  
 alle ehr Gott rein vnd allein heim kom  
 vñ bleibe / der alles güts in allen wirt  
 etet vnd schafft / zc.

## Von dem namen vnd ampt der heiligen Schrift / vnd Buchstabens.

**S**ie heilig Schrift / wirt wol heil-  
 lig vnd göttlich Schrift genant /  
 doch mit disem vndercheid / **Nie**  
 das

36

Das sie für sich selbs/ ein würckliche heilig-  
keit in jr habe/ Oder jemandes heilig  
oder selig machen künde/ sonder das sie  
von heiligen/ himmelischen dingen/ die  
in Gott vnd Christo sein/ zeuget vnd  
leeret/ vnd haltet nit in jhr die ding/ das  
non sie saget / welche allein durch den  
glauben/ in vnd bey Christo zu suchen  
vnd zu holen seind / in dem denn allein  
verborgen ligen/ alle schatz Göttlicher  
weißheit vnd wissens Col. 2.

Der Büchstab der heiligē Schrifte/  
erleucht die vernunft/ macht dz fleisch  
geleert/ den innern menschen aber/ mag  
er nit erreichen / in zu leeren oder ihme  
hilff zu beweisen/ Er drewet wol straff  
dem werck der sünden / Kan aber die bez-  
girden des hertzens nit fürkōmen / Er  
richt wol außwendig einigkeit an/ aber  
die hertzen vernewert / reinigt vnd ver-  
einigt er nit / Er richt wol eusserlichen  
gottsdiens / vnd Pharisaische fromb-  
keit an/ aber den waren gottsdiens/ vñ  
hertz frombkeit/ die für Gott gilt vnd  
besteht/ Kan er nit anrichten/ Die sünd

D

zeigt er wol an / aber sie vergeben vnd  
hinnehmen / das kan er nie.

Darumb gütter vnderscheid / bey als  
len Christen / zwischen Gottes Wort  
das ewig bleibe / vnd der h. Schrifft  
die von im zeugt / gehalten werden solz  
le / Dañ die Juden haben auch die heil  
lig Schrifft / aber nit Gottes Wort /  
welches sie lestern / verachten / schenden  
vnd schmähen / vñ haben es mit solcher  
vnehre / an das Creutz gehefft vnd hins  
gericht / So redet auch der Satan die  
heilig Schrifft / aber nit Gottes Wort /  
Ursach / er ist ein lugner / so Gottes  
Wort warheit ist / vnd nit desto weni  
ger / bekenne ich gern / das alle geschrifte  
von Gott ingegeben zur leer / straff vñ  
besserung nutz vnd güt sey 2. Timoth 3.  
vnd bey allen Christen on verächtlich /  
in hohem werde vnd ehren gehalten  
werden solle / &c.

**W**on der justification / oder  
gerechwerdung des Sünders /  
samt den fruchten.

**D**ieweil

**S** Jeweil das Reich Gottes inwendig  
 uns ist/vñ nit kompt mit euss-  
 serlichen geberden Luc. 17. Auch  
 nit ist essen noch drincken Rom. 14. So  
 glaub vñnd bekenn ich / das wir nit  
 durch werck oder Ceremonien / auch  
 nit durch die Sacrament oder Kir-  
 chendienst (welche ich doch in ihrem  
 rechten brauch vñnd werde / vnuerachte  
 wil habē) oder etwas eusserlicher ding/  
 wie das genant möcht werde / für Gott  
 beston oder genesen mögen / die selig-  
 keit züerlangen / sonder wann wir das  
 Lēmlin Gottes Jesum Christum Jo-  
 han. 1. so für vnserē sünd am creuz auff-  
 geopfferet / in todt gegeben / zü vnserer  
 gerechtigkeit widerumb auffstandē  
 Rom. 4 Durch die erleuchtung des he-  
 ligen Geists / recht noch beiden stenden  
 erkennen / mit gleubigem hertzen an-  
 men / wider geborē vñnd newe menschen  
 werden / im namen Christi vñnd in die  
 büß begeben / allein bey vñnd in Christo  
 gerechtigkeit / gnad / barmhertzigkeit  
 vñnd seligkeit sūchen / vñnd durch warē glau-  
 bē ergreiffē / des fleischs geschafft durch

D ü

den Geist tödten Rom. 8. In einem neuen leben wandlen/in Christo bleiben/das Christus durch den glauben in unsern hertzen wonende Ephe. 3. Unsere gerechtigkeit/weißheit/frömbkeit/heiligung vnd erlösung sey / das wir vns alle zeit allein des Herzen mit warheit rühmen mögen / das glaub vnd halte ich / seye die ware gerechtwerdung des armen sünders / die für Gott gilt vnd gelten wirt / dauon zum Römern am 3. vnd 10. meldung geschicht.

Sonst ist auch ein eusserliche gerechtigkeit vnd Welt frömbkeit/welche aber für sich selbs one oberzelte innerliche gerechtigkeit / nichts für Gott gilt/wie gut vnd löblich sie auch sonst ist.

Wa aber die ware göttliche gerechtigkeit ist / mangelt sie der eusserlichen frömbkeit nit / Aber die eusserliche frömbkeit/erfinder sich zum offtermal one die innerliche/denn man findet manchen/der vor der welt ein frömer biderman ist / aber vnglaubens vñ mangels halb/innerlicher gerechtigkeit / ein grosser schalck vor Gott, vñ kind der hellen.  
Noch



Noch sein vil menschen / die sich auß vn-  
 uerstand / vff solche welt gerechtigkeit /  
 one die göttliche from̄heit vertrösten /  
 vnd meinen / weil sie weder gemordt  
 noch gestolen / geraupt noch ih̄che ges-  
 brochen haben / so werd̄ inen Gott den  
 himmel nit abschlagen / aber sie irren  
 sich / Dān es fürten auch die Pharisier  
 ein vnstrāfflich leben für der welt / vnd  
 Christus sagt zū seine Jungern Mat.  
 5. Es sey den ewer gerechtigkeit besser /  
 dān der Schriftgelerten vñ Pharisier /  
 so werdet jr nit in das himelreich kom-  
 men / Dān wer sein eigen gerechtigkeit  
 auffmugt / der ist nit vnderthon der ge-  
 rechtigkeit / die für Gott gilt Rom. 10.

**Von dem Glauben / vnd**  
 wie die h. Schrifft zweierley glauben  
 fürbildet / Namlich einen eusserlichen  
 Historischen schrifftglauben / vñ einen  
 innerlichen göttlichen heiligen  
 Geists glauben.

D iij

## Von dem Historischen Schrift glauben.

**S** Er Historisch Glaub / ist / Als da  
man etwas auß h. Schrift / pres  
dig / oder hören sagen / mit sinn  
reicher vernunft fasset / dauon reden /  
schreiben oder singen kane / vñ das hertz  
noch vnernewert / vnfrom vnd vnrein  
bleibet / nit bekert / besser oder frömmet  
wirt / Vnd diser glaub / so auß dē büch  
stäbischen cufferlichen wort gefasset /  
wirt von Paulo dem heiligen Apostel /  
ein gedichter / oder geferbter glaub ge  
nennt 1. Tim. 1. 2. Tim. 1. Vnd von dem  
h. Apostel Jacobo / ein todter glaub  
Jac. 2. Darumb das er nit thetig / son  
der werckloß ist / on büß vnd besserung  
des lebens / denn er thut kein zeichen /  
Das ist / er verenderet die hertzen nit /  
treibt den alten Saurteig nit auß / son  
der laßt den Menschen in seinem alten  
sündlichen leben vnd wesen bleiben.

Also habē geglaubt Symon der zau  
berer. Acto. 8. Die Samariter / erstlich  
vmb des weiblings red vñ ansag willen  
Johan.

Johan. 4. Aber das ist nit der recht seligmachend glaub/wiewol vil leute sein/die sich jezund mit solchem Glauben/für güte Christen rechnen vnd achten/die keinen bessern süchen noch begeren/Vermeinen mit dem Bapeyren harnisch für dem Satan wol zübestohn/vnd Gott wol kōmen/als auch die vorgemelten mit der Welt fromtheit/ aber das ende vnd die erfahrung/wirt die warheit ans liecht bringen.

## Von dem warē lebendigen heiligen Geists Glauben.

**D**er ware lebendig hertz glaub/ist wie der H. Paulus sagt Hebre. 11. Ein wesen (ia selbstandt vñ geistlicher vorschmack) derē ding die zü hofen sein/vnd ist nit allein/mit den sinnen begreifen vnd wissen das ihenig/was der Büchstab von Christo zeuget/sonder er ist ein geistliche göttliche gabe/vñ theur geschenck Gottes Ephe. 2. 1 Cor. 12. Jaco. 1. Vnd labzal der seelen/auß dem brunnen des lebens/ Ein ent-

D iij

pfengtums / gemeinschafft vnd theil-  
 hafftigkeit des verheißnen vnd nun ges-  
 leisten Christi / vñ aller seiner wolthat /  
 im heiligen Geist / Die ergreiffung gött-  
 licher warheit innerlich im hertze / wel-  
 ches die lebendige kraft Gottes ist / von  
 deren Paulus 1. Cor. 2. sagt / sprechende:  
 Unser glaub besteht nit auff menschen  
 weißheit / sonder in der krafft Gottes.  
 Item / Er ist ein himlischer Sonnens-  
 glantz / der zum ewigen leben leuchtet /  
 erwemet vnd leytet / etc.

Vnd kompt diser glaub / nit auß dem  
 eusserlichen / schriftlichen / gepredigten  
 wort / wie der Historisch glaub / als  
 denn die erfahrung der recht vnd war  
 gleubigen / genügsam leeret vnd offens-  
 baret / dann sonst wurden alle zühörer  
 gleubig / wa blibe aber die tauben / die  
 nit hören künden / Sonder diser glaub  
 kompt auß dem innerlichen anblösen /  
 gehörs vñ insprechen Gottes des leben-  
 digen Worts / das geist vnd leben vnd  
 Gott selbs ist / auch ewig bleibe.

Dann also steht im Psalmen geschri-  
 ben 84. Ich will hören was der Herr  
 Gott

Gott in mir redet/ vnd Johan. 6. Wer  
 es höret von meinem Vater vñ lernts/  
 der kompt zu mir / von welchem gehöret  
 Christus sagt/ Da Er rufft Lu. 8. Wer  
 ohren hat zu hören der höre / Esaias  
 sprichet cap. 50. Des Herren vnderweis-  
 sung hat mir mein ohr auffgethon/ Als  
 so geschah auch der Purpur Kremerin  
 Lidia an irem hertzen Acto. 16. Damit  
 welcher nit auß Gott ist/ höret Gottes  
 wort nit Joh. 8. Es heisset: Meine schäf-  
 lin hören meine stimm Johan. 10.

Darum diser warhaftig seligmachend  
 glaub / solche zeichen thut/ Das er die  
 mensche zu Got beket/ zur büß bringt/  
 an sinn / gemüt vñ leben verenderet/ zu  
 kindern Gottes macht/ mit Gott befrei-  
 det/ Got in vnser hertze bringt/ die hert-  
 zen erneuert/ von sündereinigt/ in der  
 liebe Gottes vñ des nächstē anzündet/  
 hunger vñ durst nach der gerechtigkeit  
 Gottes erwecket/ die welt überwindet/  
 dadurch wir von irdischen dingen ge-  
 zogen/ in Gottes gehorsam bracht wer-  
 dē/ mit hertzlicher zünersicht vñ gutem  
 vertrauē/ in allen nöten/ hilff vñ trost/

D v

schutz vnd schirm / allein bey Gott zu  
suchen / das ende des glaubens die ewi-  
ge seligkeit dauon zu bringen.

Deßhalb solcher glaub ein gab vnd  
theur geschent Gottes / so Got vß seine  
eigenthum Ja auß dem das seines we-  
sens / geistlich vñ göttlich ist / darreichet /  
Daher den alle gabē / so dē innern mens-  
chen zur gerechtwerdung vñ seligkeit /  
von Gott durch Christum im H. Geist  
gegeben werdē / solcher art sein müssen.  
Wie dan Christus seinen jungern sagt  
vom tröster dem H. Geist Joh. 16. Er  
wirts von dem meinen nemen / vñ euch  
verkündigē / vnd weiter: Was der Vat-  
ter hat ist mein / Also bittē wir auch im  
Kirchen gsang / den heiligen Geist vmb  
den rechten glauben / etc.

Dan der natürlich mensch / vernimpt  
nichts vō geist Gottes / Cor. 2. Deßhalb  
Got alles gūten anfang / mittel vñ end  
ist / von dem alle gūte gaben / von oben  
herab kōmen / Jac. 1. Der auch seine ehz  
keine andern gibt Esa. 42. 48. Der muß  
dē ersten stein zu disem bau legen / vñ  
dē schlauch des hertzens ( dē newē most  
zū behaltē

zū behalten) zūrichtē Mat. 9. Den acker  
 zūvor mit seinē göttlichē thaw befeuch-  
 ten/ vñnd geschlacht machen / darinne  
 der gute samen geworffen / seine frucht  
 bringe Mat. 13. Darum̄ der h. Paulus  
 spricht Rom. 1. Das Euangelion sei ein  
 krafft Gottes / einē jeden der da glaubt /  
 vñd 1. Tess. 1. spricht er: Unser Euang-  
 gelion ist zū euch gewesen / mit allein  
 im wort / sonder auch in der krafft / vñd  
 im heiligen Geist / vñ in viler gewissens-  
 schafft / dann bey den gesanten Gottes  
 gibe Gott das gedeien zū ihrem pflan-  
 zen / da gehts one frucht nit abe.

Es hat auch Augustinus über Jos-  
 hannem geschriben: Glaub das du es  
 verstehest. Vñd Gregorius übers Eu-  
 uangelion: Es sey denn der H. Geist /  
 in des zūhörenden hertzē / so ist des Do-  
 ctors oder leuers red vergeblich. Item  
 Luther in seiner Postill / übers Euanga-  
 gelion Johannis / am tag der geburt  
 Christi spricht: Der glaub sey dz liecht /  
 wer den nit hab / versteh nichts in göt-  
 lichen sachen. Da möcht man fragen:  
 Ob

Ob man ohn glauben auch seligklich  
predig hören kund / 2c.

Diueil nun die heilig Schrifft be-  
zeugt / das sich Gott mit seinem gött-  
lichen wesen / im menschē ergiessen wöl-  
le / durch Christum im h. Geist / on min-  
derung vnd mehruung sein selbs / als ges-  
schriben stah 2. Pet. 1. Das allerley sei-  
ner göttlicher krafft / was vns zum les-  
ben vnd göttlichem wandel dienet ge-  
geben sey / vnd die theurest vnd aller-  
gröste verheissung (Nämlich) das wir  
mitgenossen wurden göttlicher natur /  
So wir die zergengliche lust der welt  
fliehen. Vnd das wir Christi theils-  
hafftig werden / so wir den empfang-  
nen glauben / bis ans ende vest halten  
Hebre. 3. Item / das wir glider Christi  
werden / von seinem fleisch / vñ von sei-  
nen gebeinen Ephe. 5. Durch den heiligs-  
gen Geist new geboren Johā. 3. Gottes  
reich innwendig vns Luc. 17. Unsere  
herzen ein Tempel des heiligen Geists  
2. Cor. 6. Unser Burger schafft im him-  
mel Philip. 3. Vnd eins mit Christo  
werdē / wie Er mit seinem himelischen  
Vater



Vatter eins ist Johan. 17. Item/ das wir mit dem leib vnnnd blüt Christi gespeist vnd getrenckt werden zum ewigen leben/ vnd Christus in vns vñ wir in im bleiben. Johan 6.

Wie mag's den ein ander gestalt mit dem waren seligmachenden glauben haben/ dann wie bis hieher in der leng genügsam erzelt ist/ dieweil die Christglaubigē dadurch götlicher natur teilhaftig werden/ alles vermögē/ in dem der sie mächtig macht. Wer aber anders danon helt/ dē möchte ich auch wol drumb hören / vnd was er dem waren glauben für ein natur vnd art zuschreiben wolte/ &c.

**Von den gesanten Dienern/**  
das Euangelion Christi zu predigen  
vnd vorzutragen/ zur versammlung des  
völklihs Gottes/ vnd außspendung  
der heiligen Sacramenta.

**I**n dē dienern des Euangelions  
bekenn ich also: Welche von Gott  
zu disem ampt beruffen/ erwölet  
vnd

vnd außgesendet seind. Die den Herrn  
 Christu/den Erzhirten der schaff nach  
 dem geist kennen/vnnd was sie fürtra-  
 gen / zūvor von im empfangen haben/  
 Die auch nit ein wort dörfen redē/wa-  
 dasselb Christus nit würckte durch sie/  
 Wie Paulus der Apostel von im selbs  
 bekennet Rom. 15. Die der heilig Geist  
 zū Bischoffen gesetzt hat/zū weiden die  
 gemein Gottes / welche Er durch sein  
 eigen Blut erworben hat Acto. 20. Die  
 sollich nit genötigt/sonder selbs wils-  
 lig/nit schendlichs gewins halbē/son-  
 der auß geneigtem gemüte thün 1. Pet. 5.  
 Die auch ein fürbild der gleubigē seind  
 im wort/wandel vnd lieb/im geist/im  
 glauben vnd in der keuscheit 1. Timot.  
 4. Vnnd das werck eines Euangelis-  
 schen predigers thün / ihr ampt redlich  
 außrichten 2. Tim. 4. Welches alles / ih-  
 nen ire eigne hertzē wol kundschafft ge-  
 ben werden/ob ime in warheit also seye  
 oder nit. Die wir auch dabey erkennen:  
 Wann sie die ehre Gottes / vnnd seiner  
 schäfflin nutz fromen vnd heil ernstlich  
 vnd getrewlich suchen/Vñ als bewerte  
 arbeit

arbeiter / das Wort der warheit recht  
 vorschneiden 2. Tim. 2. Christum zum  
 Fundament der kirchen legen / wie die  
 Apostel gethon 1. Cor. 3. Vnd in keinem  
 andern heil verkündigen Act. 4. Sich  
 der leer Pauli Timotheo vñ Tiro / vom  
 leerampt zugeschriben / treulich vñnd  
 fleissig halten.

Dise halte ich für rechte ware diener  
 vñnd haushalter / über Gottes geheimnis  
 nus 1. Cor. 4. Für getreue arbeiter / vñnd  
 die vñns Christus zu bitten befolhen  
 Matt. 9. Die Er vñns zu geben verheis-  
 sen Jerem. 3. Ich halte sie für zeugen  
 Christi / vñnd mitgehilffen Gottes / zu  
 deren pflanzē Gott der allmechtig sein  
 gedeien reichlich geben werde 1. Cor. 3.  
 Vnd seine mitwürckung scheinen las-  
 sen / Welche ich ires ampts vñnd diensts  
 halb / zwofacher ehren vñnd güter belo-  
 nung wol werde achte 1. Timot. 5. auch  
 nit zweifel trag / es werden solche dort  
 vom Erghirtē Christo / die vñnerwel-  
 cklich Kron 1. Pet. 5. erlangen vñnd ent-  
 pfangen. Wolt auch solche mit vñnder  
 thäniger dienstbarkeit / nach meinem  
 geringem

geringen vermögen/ selbs gern vñ wil-  
liglich heiffen nehren vñ erhalten/ das  
sie Christo zum preiß/ vñ vns zum heil/  
getrewlich möchten im lecrampft nutz  
sein/ vnd seliglich vorston.

Dieweil aber zu vnsern zeiten vil er-  
funden werde/ die sich Apostel Christi/  
gesanten Gottes / vñ diener des Geists  
rühmē/ Die es (Gott erbarmt) in war-  
heit mit der krafft wenig beweisen/ Vñ  
doch gleichwol/ was Christus von sei-  
nen aufferwölten lieben Apostlen ge-  
redt/ ihnen selbs (als ob sie den selbigen  
aller ding gleich / vnd nie weniger we-  
ren) zümessen / Die solten ihnen zur de-  
mütigüg billich bedenccken: Wie Chris-  
tus seine Junger selbs erwölet / vñ ge-  
setzt hat/ hinzügohn vñ frucht zübrin-  
gen Johan 15. Vnd ihnen seinen Gött-  
lichen Friden Johan. 14. Vnd heiligen  
Geist züuor gegeben / Sie gesant/ wie  
Er von seinem himelischen Vatter ge-  
sant gewesen Johā. 20. Vnd sie mit der  
krafft Gottes auß der höhe angethon  
Acto. 2. Welche der Geist der warheit  
selbs in alle warheit ingeleitet Joh. 16.  
Auch

Auch in ihnen geredt Matt. 10. Denen Christus das Euangelion zu predigen befolhen Marci 16. Vnd seine zeugen auff erden zu sein Act. 1. Bey denen Er. allzeit zu sein verheissen Matth. 28. In wort mit folgenden zeichē betreffiges Mar. 16. Vil wunder vñ zeichen durch ire hend gethon Act. 5. Dan sein hande war mit ihnen / Das vil menschen bekeeret / zum Christlichen glauben bracht wurden Acto 2. 4. 11. Darumb sie sich ihres beruffs / sendung / Apostelampts / vnd mitwürcung Gottes / im Herren Christo / mit warheit rühmen kundten / Das sie one fälschung Gottes Wortes / auß lauterkeit für Gott in Christo redeten 2. Cor. 2. Mit göttlichen sachen vñ giengen / vñ durch die würcung Christi redeten Rom. 15.

Die lieben Apostel / haben einen lebendigen trib des heiligen Geists / in ihnen gehabt / auch instruction, wissen vnd erfahrung / was sie thun solten / Darumb auch vil frucht geschafft / vnd ire leer / mit leiden vñ sterben versiglet / Welches die recht lebendige vocauon.

✠

oder berüffung der gesanten Gottes  
ist.

Wa nun die Prediger zu vnseren zeiten/solchs/hie obgemelt/recht bedech-  
ten/auch der frucht des lang gepredig-  
ten Euangelions (darüber sie selbs kla-  
gen vñ schreien / das es so wenig fruch-  
ten will) recht war nemen/ vnd zu her-  
zen fürten/ So würdē vil sich der hohē  
Apostolischen namen / tittels vñnd ge-  
walts massen/ sich nidrigen vnd demü-  
tigen/vñ mit grösserem nutz/vnd meh-  
rer frucht/sich für Büssprediger / vñnd  
mitschüler des glaubens dargeben/vñ  
sich zuuor auch/in nachfolgendem spie-  
gel heiliger Schrifft ersüchen/ besichti-  
gen/vnd ihre gebrechen (inen selbs zur  
besserung) baß erkennen vnd zu verbef-  
seren lernen / Die schuldigen meis-

ne ich hiemit / die frommen

vnd trewen belange

es nit.



Was

Was nach laut der heiligen  
Schrift/eines gesantē Dieners zūstād  
sey/dem das Euangelion/sampt seinē  
Sacramenten zūuerwalten gebüre.

**S** Je Haushalter sollen getrew er-  
funden werdē 1. Cor. 4. Von Gott  
gelert Johā. 6. Mit dem heiligen  
Geist gesalbet 1. Joh. 2. Vnd von Gott  
gesant sein Rom 10. Sie sollen Erbar  
vnd vnstrāfflich sein/das geheimnis  
des glaubens in reinem gewissen has-  
ben / zūnor ersücht vñ probiert werden  
1. Tim. 3. Trew Menschen/die da tüch-  
tig seyen andere zū leeren 2. Timoth. 2.  
Tüchtern / Messig / Sittig / Gastfrey /  
Leerhafftig / Gelind / Die iren heusern  
wol vorston / gehorsame kinder haben/  
auch ein gute zeugnis / von denen die  
daussen sein 1. Timoth. 3. Die von Gott  
tüchtig gemacht seyen / Diener zū sein  
des newē Testaments / nit des büchstas-  
bens / sonder des Geists 2. Cor. 3. Dar-  
umb werden solche diener / von Christo  
das saltz der erden / vnd ein liecht der  
Welt genent Matth. 5.

℞ ij

Von den selbblauffenden  
Hirten / vnd falschen Propheten / die  
sich one beweisung des geists vnd der  
Krafft / gesante Gottes / Apostel Chri-  
sti / vnd Diener des heiligen Geists  
rühmen vnd nennen.

**D**ie falschen Propheten / selbs lauf-  
fenden Hirten / vnd böse arbeiter /  
wie sie Paulus nennet Philip. 3.  
Denē es an vorgemelter sendung / frucht-  
ten vnd haltung manglet / die das wi-  
derspil erzeigen / vnd one eignen waren  
glauben / andere wöllen glauben leren /  
Die dz predigamt handwercks weiß  
treiben / vmb zeitlicher narung willen /  
gütern eiffer haben nach feisten Pfrün-  
den / vnd reicher besoldung / damit das  
jhr süchen / vnd nit was Jesu Christi ist  
Philip. 2. Die Gott nit gesandt / nichts  
mit ihnen geredt / ihnen nichts befol-  
hen Jerem 23. Vñ sich dennoch der ho-  
hen tittel vnd namen / frommer diener  
anmassen / Die künden / als böse böum  
Matth. 7. kein güte frucht tragen / die  
betümmerte hertzen vnd gewissen zu trö-  
sten /



sten/Dann Gott/ der getrew vnd gerecht ist/ vñ alles auß gerechtigkeit leistet / was Er auß seiner milten barmhertzigkeit verheisset / Der gibt kein geschehen zu irem werck / wie sie denn auch der mitwürcung Gottes / keine verheissung haben / als in fruchten wol erscheinert.

Dann von ihnen steht geschriben Malach. 2. Ich will ewern segnen verfluchen. Item/ Psal. 50. Was verkündigst du meine recht / vñ nimpst meinen bund in deinen mund / so du doch zu chert hasset / vñ würffest meine wort hinder dich / Vnd sein gewißlich alle die / So werck one glauben / genad one büß / vñ die gerechtigkeit / one die tödrung des fleischs predigen / Frid vnd sicherheit verkündigen / da weder Frid noch sicherheit ist Jerem. 6. Dafür sie den zorn Gottes über alles gotlos wesen vorbilden solten Rom. 1. Item / Alle die so vergebung der sünden / fromtheit vnd gerechtigkeit des innern Menschens / bey den Creature / oder schwachen elementen / vnd nit bloß vnd allein in Christo /

zur gerechten seines himelischen Vaters / leeren süchen / Welcher Christus / vnser einige weißheit / gerechtigkeit / heiligung vñ erlösung worden ist 1. Cor. 1. Dann in keinem andern heil Acto. 4.

**O**b auch ein vngleubiger oder gotloser / das Predigamt nutzlich oder seligklich / verwalten künde oder möge.

**N**ach dem aber etlich bestreitlicher meinung fürgebē: das nichts am Diener vñd Prediger gelegen / ob er gut oder böß / ja schon ein gotloser büb sey / sonder des ampts heiligung für genügsam achten / Welches ich nit allein nit glauben / noch recht sein bekenen kanne / sonder für ein lesterüg der sendung Christi / vñd des Apostolischen ampts halte / Dann solt allein des ampts heiligung genüg / vñd nichts an der person des Dieners oder predigers gelegē sein / sie were gut oder böß / so het wol Christus auch in seinem leiden vñ sterben / des ampts heiligung genügsam sein

Luther  
im büch  
von der  
wider-  
tauff fol.  
d. 4.

sein lassen / vnd sein person gefreyet / ein  
nem andern das ampt befolhen.

Aber es steht geschrieben Matth. 12.  
Wie kündt jr güts reden / so jr böß seit /  
vnd ein böser baum kan nit gute frucht  
bringen Matt. 7. So kan keiner zweien  
Herrn dienen Matth. 6. Auch hat das  
licht vñ die gerechtigkeit / kein gemeins  
schafft mit der finsternus vñ vngerech  
tigkeit / Noch Christus mit Belial 2.  
Corinth. 6.

Item / ist nichts am Diener gelegen /  
er sey gut oder böß / warumb heißt vns  
den Sanct Paulus / die bösen von vns  
hinauß thun / vnd mit den hürern / geis  
tigen / götzendienern / scheltern / sauf  
fern noch räubern so sich brüder nennen  
lassen / nit essen / wie klar geschriben stat  
1. Cor. 5. Wie solten sie denn vorgenger  
der gemein sein mögen / deren leer vnd  
predig man hören / vñ sich irer Sacra  
ment gebrauchen / vnd solte Nachtmal  
halten / mit dem man kein morgenmal  
nemen dörfte.

Vnd wa dise irige meinung vom  
Diener / auffrecht vnd richtig were / was

℥ üü

bets denn der außbreitung der Apostel gedörfft / das predigampt züuerwalten / dauon Act. 2. geschriben steht. Item / Warumb namen die Apostel / nit ongefertlich einen auß dem hauffen der Christen / deren doch hundert vnd zwenzig Acto. 1. da sie die Statt Jude im Apostolischē ampt ersetzen wolten / was dörffte es der mühe / Das sie zum ersten zween tüchtiger menner stellen / darnach jr gebett zü Gott thün / Das jme Gott selbs auß disen zweien einen / (jme gefellig) wölen soll / zum dritten das loß werffen.

Item / Warumb schweigt S. Paul nit der vilen wort / so er von dē dienern (des leerampts halben) Tito vnd Timotheo zügeschriben hat / wie sie eines vnsträfflichen lebens vñ wandels sein sollen / auch von denē so außserhalb der gemeinseind / ein güte zeugnuß haben 1. Timoth. 3. Tit. 1. Nach welcher übersetzten weiß der lieben Apostel vnd jrer leer / noch heutigs tags in erwölüg der Kirchen diener / gehandelt werden solte.

Es steht auch hie zübedencken die  
geschichte

geschicht Acto. 19. Da der Sathanas sprach: Jesum kenne ich wol, Paulum weiß ich wol / wer seit aber jr / darumb schreibt der h. Jacobus Jac. 3. Unders wind sich nit jederman leuer zu sein / 2c. vnd Paulus 2. Cor. 2. spricht: Vnd wer ist geschickt darzu / deshalb er schreibt Rom. 10. Wie sollen sie predigen / so sie nit gesant sind / Derhalb er befiehlt / niemandt die hend bald auffzulegen 1. Timoth. 4. das ist / ihm das predig-  
 ampt zūbefelhen.

Es steht auch zūbedencken / Warum Christus Petrum zum dritten mal frage: Ob er ihn lieb het / daruff Er ihm befalch seine schäflin zū weiden Joh. 20. dann es ist nit die art / noch das thūn Christi / das Er bottschaft werbe an seine liebe kinder / durch den Sathanam oder seine glider. Wir lesen Ephe 4. Er hat etlich zū Apostle / etlich zū Propheten / etlich zū Euangelisten / etlich zū Hirten vnd Leerern gesetzt / welche namen alle gleubige frome gotsgelerte personen erfordern / vnd wirt nit funden / das er falsch Propheten / Apostel /

℞ v

oder sonst gottloß leut zu dienern des  
Geists verordnet habe / vor denen Er  
vns selbs warnet vnd spricht : Hüret  
euch / 2c.

Deßhalb ich auß gewissen schaffte des  
Geists Christi / vñ jez erzelten sprüchen  
heiliger Sch. ist verursacht werde / ge-  
dachte meinung (das nichts an der sen-  
dung der diener gelegen sein solte / sie  
werē gut oder böß) ganz für irzig / Der  
Christlichen warheit vngemäß / Chris-  
to nit ehrlich / seiner heiligen gemein  
vndienstlich / ja schädlich erkenn / halt  
vnd bekenne / vnd sag dabey: Will man  
der massen on alle gemerck der heiligen  
Schrift / so vnbescheiden von sachen  
reden / den vntüchtigen (deren auch nit  
wenig sein) im leerampft so vil zugeben /  
so darffs niemand wunder nemen / das  
wir mit newer finsternus geschlagen /  
widerumb als ferz von Christo kōmen /  
als wir zūvor je kōmen seind / lügen für  
warheit anzunemen / Welches Gott zu  
seinem preiß vñ vnserem heil / genedig-  
lich verhüten vnd vorkommen wölle /  
Amen.

Amen. Wissen doch das auß Gott ges  
deien vnd krafft kompt / vnd nit vom  
diener noch donatistischer meinung.

## Von der Christlichen Kirchen.

**I**ch glaub/halt vnd bekenne auch/  
Das ein Christliche Kirch sey/  
Ausserlich zu diser zeit / wie es die  
erfarung mit bringe ( Gott erbarmis )  
ellende vnd jemerlich zertrent vnd zers  
strewet / Aber im Geist Gottes doch als  
lezet versamlet / die zaal der ausserswols  
ten / büßfertigen / gläubigen menschen /  
vñ verordneren zum ewigen leben / die  
Gott lieben vnd fürchten / sich dem E  
uangelio gemäß halten / weisen / leeren  
vnd durch Gottes Geist / regieren vnd  
führen lassen / eines vnsträffliche lebens  
sich befließen / in deren hertzen Gott  
durch den glauben wonet vñ würcket /  
mit welchen ich auch von hertzen begeh  
re / ein glid am leib Jesu Christi zu sein /  
der seiner kirchen haupt vñ heiland ist /  
vnd bin guter hoffnung / mit solcher ge  
meinde

meinde aller güter Gottes auß genas  
den theilhaftig zu werden.

Dieweil aber die ellende zerstreung  
der Christlichen Kirchen / diser zeit von  
wenigen bedacht / vnd zu hertzen gefür  
ret wirt / auch jederman meinet / dieweil  
die eusserliche kirchē ordnung / mit pres  
digen / Ceremonien vnd Sacramenten  
nit auffgehoben sey / wie denn etlicher  
massen noch bey allen partheyen breu  
chig (vñ wolte Gott beim grössern theil  
le / nit allein im schein nach gethon wur  
de) so sey es on not vnd gefahr / vnd steh  
gleich wol vnd recht / sey alles gut vnd  
Christenlich / vnd weiter süchens nit  
von nöthen.

Aber ein Christenliche / eusserliche / ver  
samlete Kirch / solt billich dem muster  
vñ ebenbild / der Apostolischen Kirchen /  
etwas förmlicher vnd ehlicher sein /  
namlich auß anrichtung vnd anschis  
ckung des heiligen Geists / mit iren ges  
santen / zierd / haushaltung / fruchten  
vnd allem zustand / daran den jergund /  
gar grosser feel vñ mangel gespürt vnd  
erfunden wirt.

Darzu



Darzu soll das grösser theil solcher  
 Gemein/ from̄/ heilig vnd götselig sein/  
 eines vnsträfflichen lebens vnd wand  
 dels/ dann es steht zum Ephesern am 5.  
 Er hat sie gereiniget durch das wasser  
 bad im Wort des lebens/ auff das Er  
 ihme darstellte ein herzlich Gemein/ die  
 nit hab einen flecken oder runzel/ oder  
 des etwas/ sonder das sie sey heilig vnd  
 vnsträfflich/ Darumb der heilig Pau  
 lus in seinen Sendbrieffen schreibt/ als  
 1. Cor. 1. Den geheiligten in Christo Jes  
 su/ den berüffnen heilige. Item/ Rom. 1.  
 Den liebsten Gottes vñ berüffnen heis  
 ligen. Item/ Ephe. 1. Den heiligen zu  
 Epheso/ vñ geheiligten in Christo Jes  
 su/ Also auch 2. Pet. 1. steht: Denen die  
 mit vns gleiche glauben überkommen  
 haben/ &c.

Wa aber Judas genossen vnd gleiß  
 ner vnder dem hauffen sein ( wie selten  
 fecket ) vnd doch den falsch irer hertzen  
 mit gutem schein eusserlicher from̄keit  
 verdecken/ das man sie keines bösen be  
 schuldigen kane/ die muß man dulden  
 vnd bleiben lassen/ bis sie sich durch vns  
 tugent

tugend vnd sündliche werck offbaren  
 vnd bekant machen / dan Christus hat  
 vns je nit anders gelet / dan den baum  
 an fruchten zuerkennen Mat 7. Welche  
 sich aber durch werck des vnglau-ens  
 offbaren / die soll man auß heiliger  
 liebe / durch brüderliche straff zur büß  
 ermanen / wollen sie aber nit folgen / soll  
 man (die Gemein rein zuhalten) sie als  
 vngesunde glider / inen selbs zur bes-  
 serung das sie schamrot werden vñ wi-  
 derkeren / durch den Christenlichẽ ban /  
 von der kirchen absondern Matth. 18.  
 Vnd die bösen hinaus thun 1. Cor. 5.  
 Das nit ein wenig Saurteigs den gan-  
 zen teig verseure / Dann die Christlich  
 Gemein / soll auß trieb des H. Geists /  
 mit glauben / lieb / wesen vnd wandel /  
 von der argẽ bösen welt ab gesondert /  
 vnd vndercheiden sein / vñ vnder dem  
 regiment vnd gehorsam Gottes / vnd  
 seines Euangelij leben.

Wa es aber also zugeht / wie jezund  
 gemenglich geschicht / da man jeder-  
 man (er lebe gleich) wie er wolle / in hof-  
 fart / bracht / Geiz vnd anderen lastern)  
 vngewan

vngewannet laßt Christen sein/ vnd die  
 vnbüßfertige/ bößhaftige/ für schwach  
 gläubige (im glauben auffzunehmen)  
 rechnet/ da alle lieb verloschē/ die brü-  
 derliche straff auffgehoben/ der Chris-  
 tenlich bann hingelegt/ vñ wenig trew  
 gespürt wirt/ Vnd man allein äffischer  
 weiß/ in eusserlichen dingen/ der Apo-  
 stolischen kirchē nachfolgt/ Da ist kein  
 Christliche kirch/ sonder ein arme ellens-  
 de zerstreung/ wie (Gott erbarmis)  
 segund vor augen/ das alles vnder dem  
 Christenliche namen/ vnder einand ver-  
 mengt/ hingehet/ güc vnd böß/ vñ jeder  
 man one beweisung Christliches lebē/  
 Christen sein will/ So mag disem ver-  
 derben nit gerahen werden/ wir thün  
 denn nach dem befelch Christi Mat. 9.  
 Vnd den Herrn der ernd (Christum)  
 fleißig/ vmb getrewe arbeiter ersuchen  
 vnd bitten/ die vns das wort der war-  
 heit damit sie in ihren selbs herten be-  
 gabet/ trewlich vorschneiden/ vñ  
 recht vnderscheiden/ nit sich selbs/  
 sonder die Ehr Jesu Christi/ vnd vns-  
 ser heil vñ seligkeit suchen/ Das die  
 Christens

Christenliche kirch / durch die gesanten  
Gottes / widerumb versamlet / zu Chris-  
tenlicher haushaltung bracht vnd  
auffgerichtet werde / mit Predigē / ban-  
nen / Sacramenten / vñ allem Christen-  
liche zūstand / dem Herrn Christo zum  
preis vnd ehren / nutz / heil vnd besse-  
rung seiner heiligen gemein.

## Von den Sacramenten in gemein.

**I**ch glaub vnd bekenne / das die  
Sacrament / so sie nach der Ord-  
nung vnd insagung Christi / von  
den Christgleubigen / in Christenlicher  
versamlung gebraucht werden / ein eus-  
serliche bezeugūg vñ bekantnis seind /  
der innerlichen gnaden vñ würckung  
Gottes im hertzen / dadurch gegenwer-  
tige heilige ding / bezeuget werde / Als  
namlich / durch den eusserlichen Tauff /  
die inerliche reinigung der seelen / durch  
das blūt Jesu Christi 1. Johan. 1. Vnd  
durch das brot brechē vñ drincken / die  
geistliche speisung seines leibs / für vns  
gegeben /

gegeben/ vnd seines blütes/ für vns vers  
 Gossen/ so von dem einigen waren Ho-  
 henpriester Christo selbs/ vnsichtbarer  
 Geistlicher weiß/ am innerlichen Mens-  
 schen wesentlich geschicht/ vnd das in-  
 nerliche also durch das eusserliche/ als  
 den warhafftig bezeuget/ vnd wir der  
 wolthat Gottes darbey erinneret/ auch  
 zur dancksagung so wol/ als zur ver-  
 kündigung des tods des Herrn/ vnd  
 warer Christenlicher brüderliebe/ ver-  
 ursacher werden sollen.

Deshalb sie auch zu der eusserlichen  
 haushaltig Gottes/ vñ den gleubigē/  
 lieben Gottes Kindern zugebrauchen/  
 dahin gerichtet sein 1. Cor. 10. Darumb  
 sie auch ein bezeugung der angenom-  
 men leer Christi/ bey einer versamleten  
 Kirchen/ Ein proba vnd offenbarliche  
 darstellung der Christen seind/ welche  
 durch die leer des Euangelij/ gedeyen  
 vnd mitwürckung Gottes/ im erkant-  
 nis Christi zuuor müssen vnderricht/  
 vnd erbawet werden/ Deshalb dann  
 die leer den Sacramenten vorgehn/ vñ

§

getrieben werde soll/wie von den Aposteln Acto. 2. 8. vnd 10. geschehen.

## Das die Christenliche

Tauffe zweierley seye.

**W**iewol ich glaub vnd bekenne/ mit Paulo vñ allen Christglaubigen Ephe. 4. Einen Herren/ Tauff/ glauben/ Gott vnd Vatter vnser aller/ Jedoch bekenne ich auch hiebey/ wie im anfang gemeldet/ das die Christenliche Tauffe zweierley sey / innerlich vñ äußerlich / geistlich vnd leiblich / wie auch zweierley Tauffprieester/ als Christus/ vnd der diener von Christo gesant/ das vöcklin Gottes zünersamen / dauon Christus sagt Acto. 1. sprechende: Johannes hat mit wasser getaufft / Ihr aber werden mit dem heilige Geiſt getaufft werden / nach vnlangem disen tagen/ Desgleiche Johannes der Taufffer selbs zeugt/ von seine Tauff Mat. 3. Luce. 3. vñnd spricht: Ich teuffe euch mit wasser zur büß / aber der nach mir kompt/

70  
Kompt/ 2c. der wirrt euch tauffen mit dē  
heiligen Geist vnd mit f. w. r. / 2c.

Hat nun der heiligst von weiben se  
geboren / allein mit wasser getaufft / vñ  
Christo seinem Herrn die chr vñ krafft  
des waren Tauffs allein zugeschriben /  
So thüme sich kein diener der kirchen /  
das er mit seiner Tauffe mehr künde ge  
ben dann Johānes. Wiewol der heilig  
Johānes der vorlaufer Christi / allein  
mit wasser zur büß getauffet / Aber bey  
der Apostel tauff ward auch der heilig  
Geist von Gott gegeben / Dieweil aber  
zū diser zeit vil tauffen / da kein büß fol  
gē wil / ich geschweig des heilige geists /  
So möcht wol viler tauffen nit so kreff  
tig geachtet werden / als der tauff Jo  
hannis / Wiewol auch kein Apostel für  
sein person vnd vermögen / mehr oder  
weiter / den mit wasser tauffen künden /  
Dann die innerliche Tauffe geschicht  
durch Christū den Hohenpriester selbs /  
im H. Geist / von oben herab / dem iners  
lichen menschen Joh. 3. Die eusserliche

aber durch den gesantē diener mit was-  
ser eusserlich Matth. 28.

## Von der waren Tauff im heiligen Geist/ on welche niemande Gottes reich sehen wirt Joh. 3.

1. Pet. 1.

**D**ie ware Tauff der seelen/erneue-  
rung vnd widergeburt des inner-  
lichen menschen/ ist ein einiges werck/  
des waren Hohenpriesters Jesu Christi  
im heiligen Geist Mat. 3. Lu. 3. Dur-  
ch welche/ nach dem Er Kinder zū seinem  
reich gebietet 1. Pet. 1. Sie von ihren sün-  
den reiniget 1. Cor. 6. Ihme einleibet  
vnd einpflanzet 1. Cor. 12. Sie auch/  
from̄ gerecht / heilig vnd selig machet  
Tito 3. Davon zeugen nachfolgende  
sprüch heiliger Schrift: Wir seind alle  
in einem Geist zū einem leib getauffet  
1. Cor. 12. Wie vil ewer getaufft seind in  
Christo/ die habē Christum angezogen  
Gal. 3. Ihr seit abgewaschen/ jr seit ge-  
heiliget / ihr seit from̄ gemacht / durch  
den Namen des Herin Jesu/ vñ durch  
den



den Geist vnseres Gottes 1. Cor. 6. Item/  
Eze. 36. Ich will rein wasser über euch  
giessen/vñ ihz werden rein werden/von  
aller ewer vnreinigkeit / Ich will euch  
ein rein hertz vnd einen neuen Geist in  
euch geben/1c.

Das rein wasser / dadurch wir von  
der vnreinigkeit vnserer sünden gewä-  
schen werden / kan nichts anders sein/  
denn das wasser des heils vnd lebens/  
die lebendige krafft Gottes / so auß jme  
selbs / dem brunnen der göttlichen weiß-  
heit / heils vnd lebens herauß fleußt/  
Syrach 1. Baruch 3. Esa. 12. Jerem. 2.  
Der hat vñ vermag auch ein new hertz  
zū geben / vnd sonst niemand.

Deßhalb bekene ich / das solche selig-  
machende krafft Gottes / dadurch wir  
im hertzē vñ gewissen gereiniget / from  
vñ Gott gefellig werden / keinem Ele-  
ment verbunden / sonder aller Element  
frey vnd ledig sey / vnd wie Gott im  
dienst seiner gesanten / bey dem Sacra-  
ment der Tauffe (so man sie nach seiner  
ordnung vnd insagung brauchet) sei-  
nen heiligen Geist / vnd vergebung der

sünden wol geben Kane / Also auch one  
 Sacrament / vor oder nach / seines göt-  
 lichen gefallen / durch Christum gebē /  
 außheilen vñ leisten Künde vnd möge /  
 wie Act. 8. vnd 10. geschehen / Dan̄ auch  
 Abrahe die gerechtigkeit durch dē glau-  
 ben / vnd noch in der vorhaut / vnd nie  
 durch die beschneidung zūgerechnet wor-  
 den / der auch from̄ vnd gerecht gewe-  
 sen / ehe er die beschneidung empfange /  
 wie denn Sanct Paul mit klaren wor-  
 ten zun Rōmeren am 4. anzeiget / ic.

Ich betē auch / das solch werck der  
 genaden / an kein person / zeit noch statt  
 gebunden / in keines Menschen / oder  
 Kirchen dieners hand noch gewalt / son-  
 der allein in der wilkür Gottes stehe /  
 zūthūn / wie / wa / was vñ wann er wille /  
 Dann so vil die rechtfertigung / erneue-  
 rung vñ widergeburt des hertzens be-  
 langt vnd antrifft / thūt der Diener  
 nichts zur sach / das er das selbig geben  
 Künde / Aber so vil den dienst vñ eusser-  
 lichen Menschen belangt / schafft der  
 Diener auch seine frucht / dauon denn  
 hernacher mehr folgen wirt.

Don

Von dem Sacrament der  
Taufe / so nach dem befelch Christi im  
wasser geschicht / Matth. 28.

Marci 16.

**S**ie Sacramentliche wasser Tauf  
fe / wa sie nach dem befelch vnd ins  
sagung Christi geschicht / wie da  
von Matth. 28. vñ Mar. 16. geschriben /  
vñ von dem erleuchten Apostel Petro  
Acto. 2. geleret worden ist / auch der heil  
lig Philippus Acto. 8. gebraucht hat /  
vñ von Paulo Act. 16. vollstreckt wor  
den / Halte ich für ein eusserliche anmes  
mung / oder inschreibüg / in die versams  
lete gemein Christi / vñd für ein herz  
liche gezeugnus vñd bekantnus / der  
waren Tauf Jesu Christi / so im heil  
gen Geist inerlich geschicht / in welcher  
waren Tauf / wir durch den glauben  
in das vergossen blüt Christi / von sün  
den gereinigt werden / Dann das blüt  
Jesu Christi Gottes Sons / macht vns  
rein von aller sünd 1. Johan. 1.

So ist nun die eusserliche wasser  
Tauf / ein bekantnus der vergebung

§ üü

der sünden in Christo / vnd seiner ente-  
 pfangnen gnaden / wie auch der inner-  
 lichen reinigung des hertzens vnd ge-  
 wissens / vnd erfordert die absterbung  
 des alten menscheng / dz der mit Chri-  
 sto gecreuziget / vnd wir hinfürter nie  
 der sünden dienen / sonder in einem ne-  
 wen leben wandlen sollen Rom. 6. Wa-  
 aber innerlich im hertze / das wesen de-  
 ren ding nit ist / so eusserlich durch die  
 Sacrament bezeugt werden / da treibt  
 man nur ein gespöte mit Gott / seinem  
 Euangelio vñ Sacramenten / welches  
 one straff nit wirt abgoht.

## Gemeiner bericht von dem Abentmal Christi / vnd Brot der widergedechtnus.

**N**ach dem im ewigen rath Gottes  
 beschlossen dz Jesus Christus der  
 eingeborne son Gottes / das mens-  
 schlich geschlecht widerumb vom ewi-  
 gen tod / der übertrettung Ade / durch  
 die auffopfferung seines heiligen leibs /  
 erlösen vnd wider bringen solte / darumb  
 dann

Dann das ewig Wort des Vatters / sich  
 ernidriget Fleisch worden / menschlich  
 natur / ja Knechts gestalt an sich genom  
 men Philip. 2. auch sein creutzamt züs  
 volbringen / arm vnd dürfftig auff er  
 den gelebt Matth. 8. Als er nun (der  
 ewig erlöser vñ widerbringer des heils  
 Menschlichs geschlechts) wol wußte /  
 das die zeit vñd stunde seines leidens  
 vñ sterbens für handen ware / wolt Er  
 sich mit seinen Jungern legen / vñd den  
 scheid jm̄ß mit ihnen essen / befalch das  
 Osterlam̄ (im alten Testament Exodi  
 12. ingesagt) zubereiten / Vñd nach  
 dem Er das selbig figurlich Osterlam̄ /  
 mit seinen Jungern gessen / abgeferti  
 get / vñ geendet hatte / dieweil nun Er /  
 das rechte vñd ware Gottes Lam̄ für  
 handen ware / welches am holz des  
 Creuzes / für die sünd menschlichs ges  
 schlechts / ein völlig opffer werden solte  
 Heb. 9. 10. wolt Er als ein trewer Meis  
 ter vñd Lerer / dises heiligen vñd hoo  
 hen opfferwerck's vnserer erlösung / spei  
 sung / erlabung vñd volle settigung der  
 seelen / ein widergedechtnus vñ gedenck

§ v

zeichen einsetzen / dadurch vnd dabey /  
 seine liebe Junger / vnd alle ware glei-  
 bige / sich hetten diser vnaussprechliche  
 wolthat Gottes / mit erfrischung ih-  
 res glaubens / dancksagung vnd ver-  
 kündigung seines tods / in warer lieb /  
 gegen Gott vnd ihrem nechsten zu er-  
 ineren / Nam Er das brot / dancket vñ  
 brach es ic. wie die Euangelisten dauon  
 schreiben.

Das aber Christus solche natürliche  
 ding / als brot vnd wein / vnd nit vil  
 mehr andere creaturische ding / als sil-  
 ber / gold / edel gestein / oder deren glei-  
 chen darzu gebrauchet hat / ist vnserer  
 schwachheit / vnd kleinem verstandt zu  
 gutt geschehen / die wir durch gleichnus  
 natürlicher ding (welche weiß dann  
 Christus offte gebrauchet) den verstand  
 göttlicher vnd himlischer ding / etwas  
 baß begreifen vnd verston mögen / vñ  
 wir auch auß täglicher erfahrung / gutt  
 wissens tragen / was dem natürlichen  
 leib vor nutz vnd fromen ensteht / auß  
 brot vñ wein / in rechter maß gebrauch-  
 et / Namlich das der leib dauon gespeis-  
 set / ges

set/gedrenckt/erquickt/erlabt/gesterckt  
vnd erhalten wirt.

Also hat auch Christus der Herr/  
durch solche natürliche ding/ brots vñ  
weins/ vns anzeigen vnd verstendigen  
wollen/ was sein heiliger leib vnd blüt/  
am creuz auffgeopffert/ vñ nachmals  
nach geistlicher himelischer art/ für ein  
speiß vnd drancf der seelen sey / vñ was  
(im glauben genossen) dem innerlichen  
menschen hierauf / für nutz vñ fromen  
entstohn vnd erwachsen möge/ zc.

Das diese geistliche speiß vnd trancf/  
die einige vnd warhafftige narung vñ  
erlabung der seelen sey/ damit Christus  
seine Junger / vnd alle gleubige/ wars  
hafftig speiset vnd drencket / vñnd dem  
innerlichen geistlichen menschen/ eben  
daas sey/ thue vñ zübringe/ was die na  
türliche speiß vnd drancf/ dem leib vnd  
cussern menschen.

Vnd wie die kraft der leiblichen  
speiß vnd drancfs/ am natürlichen leib  
gefület vnd entpfunden wirt/ also muß  
auch die kraft/ der warhafftigen geista  
lichen speiß vñ drancfs (des gewächß/  
sterck

steyt vnd zünemens halb in der gottes  
seligkeit) bey dem innerlichen erneuer-  
ten menschen vermerckt / gefület vñ ent-  
pfunden werden / Dan wa sollichs den  
Nachmals gestē nit folget / da ist man  
gewißlich mit dem brot des lebens / in-  
nerlich an der seelen / noch nit gespeiset  
noch getrencket worden / das man ge-  
schmeckt hette / wie süß der Herz sey 1.  
Pet. 2. vnd hat man sich vil zū frū / one  
das hochzeitlich Kleid Matt. 22. ja mit  
einem falsch vñ vnglauben / in die mal-  
zeit der kinder Gottes ingemenge / vnd  
des Herren brot vnd kelch / als vnwür-  
dig / zum gericht entpfangen.

## Von dem verstand der Wort Christi: Daas ist mein leib.

**N**ach dē der Satan / ein feind Gots  
tes vñ aller Gottes kinder / durch  
seinen list zū wegen bracht / das  
man sich zū vnseren zeiten / nit vil vmb  
den waren grund der seligkeit / sonder  
fast allein vmb eusserliche ding betim-  
meret



meret/vnd zanket / darauff partheien  
vñ secten erwachsen / die einander has-  
sen/schmehen / vnd vnchristenlich ver-  
folgen / dadurch dann die liebe ( Gott  
erbarmt) schwerlich verlegt wirt/vnd  
der glaub solcher leut/nicht an argen  
wönig gehalten wenden/züermüssen/  
es mangle ihnen noch vil an warer er-  
kennnis / glauben vnd rechtem grun-  
de der seligkeit.

Die wil dann vom verstande der  
Wort des Nachmals/vilerley sinn vñ  
meinung ist. So wil ich die Wort Chris-  
ti: Daas ist mein Leib/2c. Daas ist  
mein Blut/2c. wie der Text lauter/in  
ihrer ordnung vnuerzucke stohn lassen/  
vnd bey dem sinn Christi / vñd seiner  
selbs erklärang bleiben / Das Er mit  
diser geschicht des Brodbrechens vñd  
essens / seine Junger also durch natür-  
lich brots vnd weins eigenschafftē / der  
speiß vñ dranck / seines leibs vñ bluts /  
hat verstendigen wöllen / Wie sein heil-  
liger leib für vns gegeben / vñ sein göt-  
lich blut für vns vergossen / ein geist-  
liche / göttliche speiß vnd dranck der see-  
len sey /

len sey/ dadurch sie erquicket/erlabet/ges-  
neret/gesterket vnd zum ewigen leben  
erhalte werde/gleicher massen/ wie der  
natürlich leib/durch natürlich speiß vñ  
dranck / zum zeitlichen leben erhalten  
wirt. Vnd disen sinn bezeuget Christus  
selbs Johā 6. sprechende: Mein flei ch  
warhafftig ist ein speiß/ vnd mein blüt  
warhafftig ist ein dranck/ze.

So glaub vnd bekenne ich nun hier  
mit/das die Christglaubigē im Abend-  
mal des Herzen/nach Christlicher ord-  
nung vnd insagung gehalten/mit dem  
heiligen leib vnd theuren blüt Christi/  
an ihren seelen warhafftig vnd wesent-  
lich / gespeiset vnd gedrencket werden/  
Aber nit anhangender / beybleibender  
weiß/als inn/mit/bey/oder vnder dem  
brot / gleich ob eins one das ander nit  
sein/noch geschehē künde/ noch vil we-  
niger/das das brot der leib Christi sey/  
oder eins in dz ander verwandelt wer-  
de/nein gar nit / Ich künde mich sonst  
eines falschen Propbeten nit entschul-  
digen / wann ich auff erden/Christum  
hie vñnd da zu sein anzeigen wolte  
Matth.

Math. 24. der doch zur gerechten Gottes  
 seines himmelischen Vatters / mit  
 dem Sursum corda, wie man in der Kir-  
 chen singt / allezeit von alle Christgleu-  
 bigen gesucht / angebetet vnd göttlich  
 verehret werden solle / 2c.

Darumb lesen wir Colos 3. Seit ihr  
 mit Christo auferstanden / so sucht was  
 droben / da Christus ist / sitzend zur ge-  
 rechtē Gottes. Item / Vatter vnser der  
 du bist in den himlen. Item / Sitzet zu  
 der gerechten Gottes seines allmechti-  
 gen Vatters / bekennen wir im glauben /  
 dann Christus hat nit verheissen ins  
 brot / sonder ins fleisch zukommen / vnd  
 das auch geleistet / Er wonet durch dē  
 glaubē (nit im brot) sonder in der glau-  
 bigen hertzen.

Weiter so weiß ich auch / mit war-  
 heit keinen vnderscheid zu machē / oder  
 zu halten / zwischen den Worten Chris-  
 ti: Daas ist mein leib / 2c. Vn den wor-  
 ten Johan. 6. von der geistlichen spei-  
 sung / wie etlich zweierley essen / des et-  
 nigen leibs Christi machen / da eines dē  
 gläubigen zur seligkeit / das ander den  
 vngläubigen

vngleubigen zum gericht dienen solle/  
 denn dise wort: Daas ist mein leib/ sein  
 nit den augen/ sonder dem verstand ge  
 redt / deßhalb kane ich sie von keinem  
 andern brot verstohn / dann eben von  
 dem / Davon Johan. 6. also stah/ da  
 Christus spricht: Ich bin das lebendig  
 brot / der Ich vom himmel herab kom  
 men bin / wer vō disem brot essen wirt/  
 der wirt leben in ewigkeit/ vñ das brot  
 das ich geben werde / ist mein fleisch/  
 welches ich geben werde/ für das leben  
 der welt/ &c.

Wa aber die wort des Nachtmals/  
 von einem andern brot / dann davon  
 Johan. 6. geredt/ zūnerston weren/ so  
 müste folgen / das dise obgemelte ver  
 heissung ( von dem brot das Christus  
 sein fleisch neñet/ so Er für der welt lebē  
 geben werde ) noch nit geleistet were/  
 das ferre sey von aller Christgleubigen  
 hertzen.

Darumb vnd dieweil denen worten  
 Christi ( daas ist mein leib ) im Text  
 nachfolget: Der für euch gegeben oder  
 gebrochē wirt / kan ich sie nit vom Sa  
 crament

cramentlichē brot verston / welches nie  
für vns gecreuziget / noch ans creuz  
kōmen / sonder allein das brot Gottes /  
so vom himel herab gestigen / der welt  
das leben zūgeben / Christus selbs / in  
eigner person / warer Gott vñ mensch /  
hat vns am creuz / durch sein blüt er-  
kauft / vnd vom ewigen todt erlöset.

Disen sinn zūbeweren / bezeugt Chris-  
tus selbs Johannis 6. wie obgemelt /  
sprechende: Ich bin das lebendig brot /  
der Ich vom himel herab kōmen bin /  
wer von disem brot essen wirt / der wirt  
leben in ewigkeit / vnd das brot das ich  
geben werde / ist mein fleisch / welches  
Ich geben werde für das lebē der welt.  
Wie bedenck die zweierley brot / wa je-  
des her kōmen / vnd welches für das le-  
ben der welt geben sey / vñ laß nur Chri-  
stum war haben / in des munde kein bes-  
trug nie erfunden ward Esa. 53.

Weiter glaub vnd bekenne ich auch /  
das Sacramentlich brot vñ wein / an-  
derem gemeinen brot vñ wein / der na-  
tur halb gleich sein / wie es den Paulus  
i. Cor. 11. brot / vnd Christus Matth. 26.

gewächs des Weinstocks nennet / aber  
 vmb der insagung Christi / vnd der  
 grossen herzlichem geheimnis willen/  
 so vns dadurch fürgebildet wirt / halt  
 ichs für ein brot vnd Elch des Herzen/  
 eines grossen vnderscheids gegen an-  
 derem gemeinē brot vnd wein / dieweil  
 es vom Herren Christo / zu einem son-  
 dern ampt verordnet worden.

**Von dem warē Abendmal**  
 Christi / vnd speisung der Christglaubigen /  
 darinn der ware Hohepriester  
 Jesus Christus selbs Wirt vnd speiß  
 ist / on welches niemand das ewig  
 leben in ihm haben wirt

Johan. 6.

**I**ch glaub vnd bekenne / daß das  
 ware himelisch Nachtmal (nach  
 dem grund zu reden) sey ein geist-  
 licher göttlicher handel Christi / vñ sei-  
 ner newgebornen glaubigen lieben Kin-  
 der / Ein freudenreiches mal / darinn  
 Er selbs / on alle Elementische mittel /  
 auß dem wort des lebens das Er selbs  
 ist / sie

ist/ sie seine liebe Kinder / durch iren waren glauben / mit seinem heiligen Leib vnd Blut / warhafftig vnd wesentlich an iren seelen speiset vnd drenchet / versorgner geistlicher / aber doch im hertzen vñ gewissen (trosts / fridens vñ freuden halb) sünder empfindlicher weiß / dadurch sie generet / zum güten gestercket / vñ zum ewigen leben erhalten werden.

Darzu aber Christo / keines eusserlichen dings oder Mittels von nöthē / sonder allein eines gleubigen / widergebomen / liebeichen hertzens / den wir ein sollich hertz ist / so oft es sich den bey der begengēnus des Herren Abentmals / oder one das selbig / durch waren glauben / im Herren Christo erschwinget / so wirt es von ihme / durch die verwalung seines Hohenpriersterlichen ampts / erfrischet / erlabet / ergetet / gespeiset vñ gedrenchet / zur sterck / gewächs vñ zunemen / des innerlichen neuen menschenges / Dann also steht geschriben Apoc. 3. So biß nun eifferig vñ thün büß / sihe / Ich bin für die thür

G 4

geretten / vñnd Klopff an / so jemandē  
mein stin hören wirt / vñnd die thür auff  
thün / zū dem werd ich ingohr / vñ das  
Abentmal mit ihm essen / vñnd er mit  
mir / ic.

Vñnd wie Christus sollich s bei seinen  
widergebornen lieben kindern / im brot  
brechen oder Nachtmals handel thün  
kane / also auch vor oder nach / one das  
brotbrechen / vñnd alle Sacraments  
handlung / Denn Er mit seiner genas  
den / an nichts eusserlich ist gebunden /  
wa weren sonst die gläubigen lieben als  
Väter bliebē / zū deren zeiten / die Sa  
crament noch nit ingesetz gewesen / vñ  
sie dannoch vom geistlichē felsē Chris  
to gessen vñnd getruncken haben / wie  
Paulus bezeiget 1. Cor 10. Auch Abra  
ham den tag des Merien mit freuden  
gesehen Johan. 8. sonst hetten sie auch /  
nach den worten Christi / kein leben in  
ihnen gehabt.

Wa aber das hertz nit zūvor / durch  
waren glauben / den inwonendē Chris  
stum Ephē. 3. die speiß des lebens ges  
fast hat / da wirt man des brotbrech  
ens für



ens für Gott / keine genuss / sonder schas  
den vnd schuld haben / Darumb der  
geistreich Apostel Paulus / gar trew-  
lich ermanet / alle die / so des Herre brot  
vnd kelch niessen wollen / sich vorhin zu  
ersuchen vnd zu prüfen / vnd als dann  
erstet von diesem brot essen / vnd nit ehe /  
damit sie ihnen nit selbs das gericht es-  
sen / vnd am Leib vnd Blut Christi  
schuldig werden.

Deßhalb glaub vñ bekenne ich abers  
mals / Wa das völklin Gottes / durch  
die gesante diener / im namen Christi  
versamlet wirt / vñ das Abentmal von  
den Christgleubigen lieben Gottes kind-  
ern / zur widergedechtnus / dancksa-  
gung vnd verkündigung des todts  
Christi gehalten wirt / das da der gleub-  
big Mensch / zweierley speiß vñ dranc  
entpfahet / wie er denn auch zweierley  
namlich geist vnd fleisch ist / wie im an-  
fang gemeldet / zc.

Erstlich entpfächt er die speiß vnd  
dranc / des heiligen Leibs vnd Bluts  
Jesu Christi / so der einzige Hohepriester  
Jesus Christus / mit vnd in seinem le-

89  
bendigen Wort allein gibt vnd dar  
reich/ on alle Elementische mittel/ ges  
hilff vnd zu dienst der menschen/ allein  
durch waren glauben/ dem innerlichen  
ernewerten menschen/ der verschmach  
ten hungerigen seelen / zur erlabung/  
sterck vñ erhaltung in das ewig leben/  
welche niemand anders/ dan allein der  
Son des menschen Ihesus Christus/  
vom Vatter versiget Johan. 6. geben  
kane/ dauon auch de Consecratione dist.  
ij. cap. Vtrum also geschribē steht: Chris  
tus ist selbs der recht vnsichtbar Prie  
ster/ dises edle geheimnis seines Tacht  
mals/ welches leib durch sein selbs dar  
reichung vñ Consecration, durch krafft  
vnd segen seines himmelischen Worts/  
nit in das brot/ sonder in das hertz aller  
glaubigen/ zur speiß geben wirt/ 2c.

Die andere / ist die natürliche/ sicht  
liche / leibliche speiß vnd dranc/ das  
brot vnd kelch des Herren / so der leib  
lich priester oder diener/ dem leiblichen  
menschen darreicht / zur dancksagung  
der geistlichen speisung / vnd widerge  
dechens/ des dargegebenen Leibs/ vñ  
heiligen

90

heiligen vergoßnen Bluts Jesu Christi/  
am holtz des creuzs / für unsere sund  
geschehen / des Herren tod vñ wolthat  
an vns gelegt / dadurch Er vns zur ers  
lösung / zur speiß des lebens / vñ zur  
gerechtigkeit ist worden / mit lob vñ  
danc dabei zu rhümen vñ zu verkün  
digen / bis das Er kōmen wirt / zu rich  
ten die lebendigen vñ todten / Dann  
sein die gleubigen hergē ein vrsach der  
gegenwertigkeit Christi / dann wa die  
selbigen nit vorhandē / da wirt sich wes  
der der Wiert / noch die speiß des lebē  
finden lassen / da helt man Nachtmal  
on den Herren / empfācht des Herren  
brot vñ kelch zum gericht / vñ wirt  
schuldig am leib vñ blüt des Herren.

## Wunder prüfung vñ vor bereitung der disch genossen Christi.

**E**s ist vnwidersprechlich bey allen  
recht vñ wargleubigen / das alle  
die / so vom brot vñ kelch des Her  
ren / zu ihrom heil würdiglichen essen  
G uij

91  
vnd trincken wöllen / zūvor ein rechte  
erkantnis Christi haben müssen / ihr les  
ben durch büß vñ begnadung Gottes  
gebesseret haben / liebe Kinder Gottes /  
vnd seine Junger sein sollen / denen diß  
brot zur widergedechtnis / vñ verkün  
digung des todes Christi / vom Herrn  
Christo allein verordnet ist vnd zūstat /  
Dann man fasset mit den newen Most  
in alte schleuch Marc. 9. Der Saurteig  
des alten sündlichē lebens / muß zūvor  
aufgefegget sein 1. Cor. 5. dz man sich nit  
one dz hochzeitlich Kleid / in dise malzeit  
inmenge / vñ eusserlich mit falsch / durch  
begengtnis des Nachtmals fürgebe /  
innerlich zūhaben / des man doch im  
herzen manglet / vnd dauon es nichts  
weiß / fület noch entpfunde.

Dem so im alten Testament die vn  
gereinigten vom figurlichen leiblichen  
Osterlam nit essen dürfften 4. Mose 9.  
willes vns (hie) vil weniger gebüren /  
darumb der geistreich Apostel Paulus  
2. Cor. 13. trewlich ermanet sprechende:  
Versüchet euch selbs / ob jr im glauben  
seit / prüfet euch selbs / oder erkennet ihr  
euch

92  
euch selbs nit / das Jesus Christus in  
euch ist / es sey dann das jr verworffen  
seit / Daher dienet auch der 26. Psalm  
wol zü betrachten / auch das Christus  
Luc. 17. selbs spricht: Das reich Got-  
tes ist inwendig in euch / So will von  
nöthen sein vnser hertzen zü ersuchen  
des reichs Gottes in vns war zünemē.

Erstlich des waren glaubens halb  
dauon züvor ein sonderer artickel ge-  
stellt ist.

Zum andern / dieweil die lieb / als ein  
frucht des warē glaubens / ein fürnema-  
lich gemeret der Christenheit ist / dabey  
man die Junger Christi erkent Joh. 13.  
vnd ein sonderlich notwendig stuck / zü  
diser Nachtmalischen proba gehörig /  
so müssen wir vnser hertzen erforsche /  
das nit etwan ein vnliebe in vns / ge-  
gen einigem menschen / vnd in sonder-  
heit gegen den mitgenossen vnd nachts-  
mals kindern erfunden werde.

Dann wa mangel an der lieb erfun-  
den / da ist schon die sach falsch / vnd soll  
vorhin gebesseret / vnd der mangel ers-  
etzt werden / die gab vor dem altar ges-

G v

lassen / vñ die versorgung des Brüders  
zūvor geschehen Mar. 5. man heit sonst  
mit des Herre Nachtmal. ob man schon  
Nachtmal heit / wie Paulus auch die  
Corinther / der vnlieb halb / vñ das sie  
den leib des Herren nit vñderscheiden /  
beschuldiger 1 Cor. 11. Dann on die wa-  
re Brüd erliebe / kan man mit warheit /  
mit ein brot genent werden . Cor. 10. des-  
ren doch aller / ein hertz vñd ein seel sein  
soll Acto. 4. vñd keiner gegen dem an-  
dern / sich einiger vnlieb besorgen / son-  
der alles gūten soll versehen künden /  
Dann wie vil kornlin zermalen / in ein  
brot gebachen / vil beerlin zertrucke / zū  
einem drunck werden / Also sollen die  
waren Christē / durch die lieb zūsamē  
fliessen / ein leib vñder irem haupt Chri-  
sto sein / 10.

Aber zū diser zeit / werden vil erfund-  
den / die Nachtmal mit einander hal-  
ten / vñd gūt Christen sein wōllen / die  
doch nit so vil zūuersicht der liebe zūsas-  
men tragen / das einer in der not / bey  
dem andern ein brot zū entlehenen fin-  
den / sich

94

Den/sich versehen d d ruffte/ich geschweig  
anderer ding/ zc.

Zum dritten sollen wir vns ersüchē/  
ob wir auch den sinn Christi / von dem  
wortē des Abendmals / von seinem leib  
vnd blüt haben vnd recht verston.

Item/ Ob wir Christum nach beiden  
Stenden/ auch recht erkennen / wahrer  
Er kommen/ wer Er sey/ vnd was in  
ime zū suchen vñ zū finden/ vnd ob wir  
auch wesentlich/an vnserē seelen/durch  
waren glauben/mit seinem heiligē leib  
vnd blüt / von ihme gespeiset vnd ge-  
drencket seyen / ob wir williglich büß  
angenomen/das vngöttlich wesen ver-  
leugnet Cit. 2 lust/ lieb vnd begird has-  
ben zur fromkeit/gerechtigkeit vnd al-  
len Christenlichen tugenden/sampt et-  
nem haß vnd abscheuen / aller vnges-  
rechtigkeit vñ vnruhent/Vnd was wir  
vns/in verenderung vnser sündlichen  
lebens gebesseret haben/ Wie wir vns  
an Gott ergeben/gegen ihme gesinnet/  
vnd was wir vmb seines heiligen Na-  
mens willen/annemen/dulden vnd lei-  
den mögen/zc.

Allen

27  
Aller diser obgemelten fruchten vnd  
würckungē / so die seligmachende speiß  
vnd dranc / den würdig niessen zū  
bringet / vnd bey inen würcket / deren sol  
len die Nachmals Kinder bey inen wol  
warnemē / Auff das man nit mit nachs  
mal halten / den Sigel warer fromkeit  
auffdrucke / was dz hertz noch nit / durch  
den finger Gottes / mit rechtem glau  
ben / vnd warer gorseligkeit begabet vñ  
beschrieben sey / vnd für die speiß des les  
bens / den tod vnd das gericht erlang /  
zū ewigem schaden vnd verderben / etc.

Den so natürlich speiß vnd dranc /  
dem hungerigē / matten / verschmactē /  
leib fülende erquickung / krafft / sterck /  
gewechs vnd zunemen bringet / zū leib  
lichen geschäften vermöglich macht /  
Wie vil mehr / wirt die speiß des lebē /  
dem innerlichen newen menschen / göt  
liche krafft vnd sterck / lust / lieb vñ ver  
mögen / zū allen Christenlichen tugens  
den vnd Gott gefelligen werckē / leisten  
vnd darreichen / das man mit dem hei  
ligen Apostel Paulo sagen kane / wie zū  
dem



96

den Philippem am 4. steht: Ich vers  
mag alles / durch dē der mich mächtig  
macht / &c.

**O**b Judas auch dē Reich  
nam Christi / im Nachmal entpfan  
gen hab / oder ihn irgent ein glaub  
loser / jmer entpfangen werd  
oder möge?

**D**er Leib vñ das Blut Jesu Chri  
sti vnser Herrē / Ist ein geistliche  
speiß vñnd dranc der seelen / des  
halb sie auch von nichten / dann was  
iwer geistlich en art ist / entpfangen wer  
den mag / dann wieder glaub nit jeders  
mans ding 2. Tes. 3. also dise speise / auch  
nit jederman / sonder allein den glaubi  
gen nießlich / wie auch ihnen allein ver  
ordnet.

Das aber die Kirch gesungen hat  
Es nemens die güten / es nemens die  
bösen / aber mit vngleichem loß oder  
glück / zum leben oder zum verderben /  
Ist nit

Ist nit von dem leib vnd blüt Christi  
 so allein zum leben / vnd nimmer zum  
 tod entpfangen werden mag / sonder  
 vom brot vnd kelch des Herzen gesagt  
 vnd geredt / so für den euffern mensche /  
 zur widergedechtnus verordnet ist / wel  
 ches Judas gleich so wol / als die an  
 dern Junger entpfangē / aber ime / von  
 wegen seines falschen / vnglaubigen  
 hertzes / zum gericht gedienet / wie noch  
 vilen seines gleichē auch geschicht / die  
 am Leib vnd Blüt Christi schuldig  
 werden.

Das aber eilich meinen / man künde  
 nit am leib vnd blüt Christi schuldig  
 werden / man esse vnd drincke es denn /  
 die möchten bedencken: Wie eitter sich  
 an einem Fürsten oder Herzē verschul  
 den künde / Der sich des Fürsten Sigels  
 oder Wapen freuenlich annimpt vnd  
 gebraucht / dem es nicht zūstah / noch  
 gebüret / vñ es verunehret / oder in Koch  
 tritt / vnd dennoch den Fürsten an sei  
 nem eignen leib nimmer anrüret / Also  
 such hie / bey dem brot vnd kelch des  
 Herzens.

58

Herren. Es war auch der tod nit im  
Apffel/den Eva vñ Adam assen/ noch  
dennoch assen sie den tod daran.

Weiter/ disen mißuerstand ( das etli  
glaubloser Christum empfangen kün  
de) abzulenē/ darzü bedenet man nach  
folgende spruch d. Schrifft: Erstlich/  
das der natürlich Mensch nichts ver  
nimpt vom Geist Gottes 1. Cor 2. Vnd  
die gottlosen die geheimnis vom reich  
Gottes nit verstohn mögen Marc. 4.  
Auch das niemandt Christum einen  
Herrn heissen künde/ ohn den h. Geist  
1. Cor. 2 Das man auch nit newē most  
in alte schleuch fasset Matth 9 Vnd  
niemandt zweien Herren dienen möge  
Matth. 6. Ja niemandt zūgleich des  
Herren kelch/ vñ der Teuffel kelch drin  
cken möge 1. Cor. 10. Vnd Christus nit  
stimmet mit Belial/ Die gerechtigkeit  
keinen genieß hat mit der vngerechtig  
keit / Das liecht kein gemeinschafft mit  
der finsternus 2. Cor. 6. Auch kein gott  
loser den friden des Euangeliū endea  
pfangen möge Matth. 10. Wie solt er  
vonn

denn den edlen/theuren Leib/vnd heiligs Blüt Jesu Christi Gottes Sons/ erreichen oder entpfangen mögen.

Weiter / wa ein gottloser/den leib oder das blüt Christi möchte oder künde entpfangen/so het er auch das ewig leben / laut der wort Johannis 6. oder aber müste folgen/ das der leib vñ das blüt Jesu Christi / in der niessung der gottlosen/seiner krafft / lebens / eigenschafft/natur/wesens vñd würckung beraubet sein müste/ das nit sein kane/ dieweil er spricht: Welcher mein Fleisch ißt/ vñ drinckt mein Blüt/ der hat das ewig leben/ Vñ mit dem wörtlin (welcher) gang niemand außschleußt. Icē / Er bleibt in mir vñd ich in ihm / dann wer zū mir kompt (spricht Christus) den werd ich nit hinauß stossen.

Darum auch der heilig Johannes/ der unwürdigen niessung / nit mit einem wort gedencet / da er Johan. 6. von der speisung vñd drenckung des waren leibs vñd blüts Christi schreibet/wie

bet / wie auch Christus nichts davon  
gemeldet / als der wol gewist / dz solche  
speiß mit an die Gottlosen reichen mös  
ge / vnd kein glaubloser solche empfang  
en / noch deren theilhaftig werden  
künde.

Das aber erli<sup>t</sup> one grundt heiliger  
Schrift / zweierley essen vnd drincken /  
des einigen laibs vñ blüts Jesu Christi  
machen / Eines für die gläubige Das  
ander für die vngläubigen / ist vormals  
(als der warheit vngemäß) gemüßsam  
verlegt / Dañ wie die wort des Nachts  
mals / vñ die wort Johan. 6. auß ei  
nem munde vñ geist geredt sein / also  
sind sie auch an beiden örthen / geist  
vnd leben / von einerley fleisch Christi /  
speiß vnd dranck zuu rison / vñ haben  
keinen vnderscheid / dann das Christus  
im Abendmal / seinen lieben Jüngern  
vñ gläubigen / das Sacramentlich  
brod vnd wein / zur widergedechnus  
seiner wolthat / verordnet vñ ingesetzt  
hat / davon Er Johā. 6 nichts gemel  
det sonder allein bei der geistlichen was  
ren niessung hat bleiben lassen.

h



Zum beschluß/das Judas Christum  
 nit entpfangē habe/so schreibe Johans  
 nes der heilig Euangelist am 13. Als  
 bald Judas den ingerauchten/darge  
 reichen bitten entpfangen habe/da sey  
 der Satan in ihn gefaren/ So wissen  
 wir/ das Christus in denen bleibe vnd  
 wonet/ die sein fleisch vñ blüt essen vnd  
 drincken Johan. 6. Wann Judas (in  
 den der Satan gefarē) Christum auch  
 entpfangen hette/wie möchten sich den  
 dise zween widerwertige Herren / in  
 der behausung Jude/miteinander ver  
 einiget vnd betragen haben/ So doch  
 Christus mit Belial nit stimmet/ Das  
 liecht kein gemeinschafft mit der finster  
 nis hat 2. Cor. 6.

Das aber der Satan / im Juda ge  
 wonet vnd gewürcket habe / er findet  
 sich in der folgenden frucht / Als da er  
 seinen trewen Meister Christum ver  
 rietete/sich selbs erhencket/ 2c. Das er  
 aber Christum auch entpfangen habe/  
 ist weder mit schriften oder früchtē zū  
 bezeugen.

102

bezeugen. Darumb schreibt Augusti-  
nus super Iohan. Tract. 59. also: Die jün-  
ger haben gessen das brot den Herren/  
Judas aber hat gessen das brot des  
Herren / wider den Herren / ihene zum  
leben / diser zum tod oder pein.

## Von dem Stillstandt des Brotbrechens bey dem Sacra- mentlichen Abendmal.

**E**s werden bey allen Partheien et-  
lich erfunden / so zu disen vnseren  
zeiten / des Sacramentlichen Ab-  
entmals vnd Brotbrechens / sich nie  
vnderziehen wöllen / Vileicht etliche /  
on merckliche beschwerung ihres gewis-  
sens nit thun künden. Was aber eines  
jeden vrsach seye / laß ich inen selbs ver-  
antworten / wa es auß verachtung / der  
insagung Christi geschehe / so were es  
nit güte / Was aber meine vrsachen  
seind / des Brotbrechens bey dem Sa-  
cramentlichen Abendmal / ein zeitlang  
noch oberzüstohn / bekenne ich ohne  
schem also.

**h ij**

Zum ersten / Ich weiß das die Sacramenta / der eusserliche versamleten / bennndischen / Christenlichen Kirchen / zū gehörig vnd verordnet seind / welche aber jezund ein lange zeit wie noch / ihesmerlich zerstreut gewesen / als augenscheinlich mit fruchten vñ thaten (Gott erbarmis / dem sey es geklagt) wol zū beweisen / zc.

Zum andern / Das jezund vilerley Secten vnd Kirchenpartheyen fürhans den seind / da ein jede für sich / den namen der Christenlichen Kirchē rhümet / vnd doch mit andern nit stimmet / noch sie für mitglieder erkennet / zc.

Zum dritten / Das jezund fürnemlich viererley Nachtmal / bey viererley Kirchen / vngleichs verstandes gehalten werden / da ein jede ihren verstand vom Nachtmal / recht sein rhümet / die andern irrthums vnd misverstandes hierinn beschuldiget / auch mit so vngebührlichen worten / das ich dieselbigen



gen wort(er Gernus zuuerhütē) mit mehr  
den will.

Zum vierdeen / Das vnchristlich  
treiben/etlicher Predicanten vnd Lees  
rer / die das sichtbarlich Sacraments  
lich Nachmal/so notwendig machen/  
als ob on das kein seligkeit oder gnad  
erlangens bei Gott were/damit sie das  
arm gemein volck dahin bringen/ Das  
es on alle erfahrung vnnnd prüfung der  
herzen / in grosser blindtheit/vnd mit  
vnuerstande herzu eilet/ihme selbs das  
gericht entpfächt/hernach wie vorhin/  
im alten weltleben vnd wesen/ on was  
ren glauben/lieb/ büß vnnnd besserung  
bleibet / Darauf dann Christo/seinem  
lieben Euangelio/vñ auch den Sacra  
menten/nur spott/schand vnd verach  
tung erwechset vnnnd folget/auch erge  
rung anderer Menschen / wie am tag  
vnd offenbar.

Zum fünfften/Dieweil den kein vor  
gehende büß/ware frucht des glaubē/  
noch brüderliche lieb vnd straff / einige

h ij

keit der hertzen/gewechs götlicher gnaaden / noch Christenlicher bann/ sampt anderem züvor gemelder/ gespürt noch öffentlich befunden wirt/welches doch alles zum rechten brauch des Sacraments (nach der heiligen Schrifft außweisung) will gehören.

Deßhalb ich (für mein person zü reden) acht zü diser zeit gut vñ besser sein/ (mit auß verachtung sonder auß warer Gottesforcht) ein zeitlang still züstoßn/ weder mit schade meiner seelen züentpfangen/ ja besser wol entzihen/ dann übel genossen/ Dann der es auß Gottesforcht vnderlaßt/ der felt doch nit in dz erschrockenlich vrtheil Gottes/ Vñ kan nit desto weniger / in krafft des waren glaubens / mit dem heiligen Leib vnd Blüt Christi / täglich gespeißt vnd getrencket werden/ wie alle Gottes gelerten wol wissen / laut der wort der Offenbarung Johannis am dritten Capitel / ꝛc.

Zü diser meinung/ hat auch gestimmet D. Martinus Luther/ im Büchlein vom

vom anbetten des Sacraments / am  
 dritten blat des büchstabens A. spricht  
 er: Das ist war / das du ohne das Sa-  
 crament / leben / from̄ vnd selig werden  
 kanst. Item / im andern theil wider die  
 himmelischen Propheten sagt er: Du  
 bist nie verdampft / ob du schon ohne das  
 Sacrament bleibest. Item / im Brieff  
 in druck außgangen an die Christen zu  
 Straßburg schreibt er: Ob du gleich  
 nit zum Sacrament gehst / kanst du  
 dennoch durchs wort vnd glauben sel-  
 lig werdē. Item / Im getruckten brieff  
 an die vō Franckfurt am Meyn spricht  
 er: Das einer ehe sein lebenlang des  
 Sacraments entberen solte / ja ehe ster-  
 ben vnd alles leiden / ehe er es von ei-  
 nem Zwinglianer entfangē solte. Im  
 Büchlin von beiderley gestalt des Sa-  
 craments gibt er zuuerston / das glaub  
 vñ lieb / so allein not seyen / den Sacra-  
 menten vorgohn sollen / spricht: Wann  
 der brauch der Sacrament Christen  
 mächte / so were kein leichter ding / denn

h. iii

ein Christ sein / vnd also (spricht er)  
möcht auch ein Saw ein Christ sein / &c.  
hec ille.

Item / Martinus Bugrus / in sei-  
nem ersten Commentario, über das 6.  
Capitel Johannis / hat auch von diesem  
vnd anderem / wol vñ Christenlich ge-  
schrieben / wie noch zu sehen / aber 13  
Sund einanders gehört wirt.

Sollich's schreib ich / doch nit der meis-  
nung / mit Luther oder Zuger n ein  
gesinnen zu probieren / auch nit zu ver-  
kleinerung des Sacramentlichen Ab-  
benimals / sonder zu meiner entschul-  
digung / vñ den einfeltigen lieben Chri-  
sten (so in ihrem gewissen / des Nach-  
mals halb angefochten / vnd durch die  
treiber geengstiget werden) zum trost /  
ihnen damit anzüzeigen / wa es sonst  
glaubens vnd lebens halb / recht mit  
ihnen steht das sie dennoch an dem heil /  
vnuersaumpf vnd vnuer'ürget seyen /  
so sie erzeiter vrsach halb oberstion.

Vnd

Vñ wünsch doch dabey von hertzen/  
 was es Gott gefiel/ das heutiges tages  
 die Christenliche Kirche/ vñ anschickung  
 vñ ind geneidiger heimsückung Gottes/  
 durch seine getantē/ mit völliger hauffs  
 haltung/ der Sacrament vñnd allem  
 Christenliche zūstande/ möcht angehn/  
 aufgericht werden vñ zu freffen kom  
 men/ So wolt ich mit frolocken vñnd  
 dancksagung/ Gott dem Herren/ auch  
 mit seiner hilff/ vñnd vnderthenigem  
 fleiß vñnd dienst/ gern mit der last sein.

## Von den güten wercken vñnd ihrer belonung.

**W**ie vns die heilig Schrifft zweier  
 ley gerechtigkeit fürbildet/ nams  
 lich göttliche vñnd menschliche/  
 Also sein auch zweierley güte werck/  
 wie auch zweierley belonung der selb  
 igen.

Die ware güte werck/ würcket allein  
 Gott in den gläubigē, durch sein heilis

h v

gen Geist / Dann er ist der Weinstock /  
 wir die zweig / so wir in ihm bleiben /  
 werden wir frucht bringen / aber on ih-  
 nen künden wir nichts thun Johan. 15.  
 Sein auch nit tüchtig etwas zu gedens-  
 cken / als von vns selber 2. Cor. 3. dann  
 das wöllen vnd volbringen gibt allein  
 Gott Phil. 2. Deshalb die ware güten  
 werck / so den newē auß Gott gebornen  
 menschen zugeschrieben werden / die sel-  
 ben süchen nit belonung / als den him-  
 mel dadurch zu erlangen / sonder thun  
 alle ihre werck Gott dem allmechtigen  
sampt seinem geliebte Son Jesu Chri-  
sto dem König vnd Herrn aller Her-  
ren / zu lob / preiß vnd ehren / dem nech-  
sten zur besserung / auch ihren glauben  
damit zübeweisen.

Deshalb nit die güten werck / sonder  
 das vertragen in die werck falsch vnd  
 vnrecht ist / darumb der heilig Paulus  
 spricht Tit. 3. Nit vmb der werck willen  
 der gerechtigkeit die wir gethon hat-  
 ten / sonder nach seiner barmherzigkeit  
 macht er vns selig. So ist nun der heilig  
 lig

lig Geist ein vrsprung des glaubens/  
lieb/ vnd hoffnung / Der glaub/lieb  
vnd hoffnung / ein vrsprung aller güt-  
ten werck.

Weiter so sein auch der werck des wa-  
ren glaubens dreierley / Erstlich sein  
etliche werck / die allein gegen Gott ge-  
richt sein / Als betten/danck sagen/lob-  
ben/bekennen/ anruffen/gedult in trüb-  
sal/creuz vnd leiden zü beweisen/ vnd  
solche werck werden opffer des lobs ge-  
nennt Heb 13. Opffer Gott danckopffer  
vnd bezal dem höchsten deine gelübd /  
vnd Psal. 50. Wer danck opffert preis-  
set mich.

Die andere ware güte werck / sein die  
werck der Brüder liebe/ Als trew/lieb/  
wolthat vnd barmherzigkeit gegen  
den glaubens genossen/ Auch die werck  
der gemeine liebe / gegen den nottürff-  
tigen / vnd vnseren feinden vmb Chris-  
ti willen zü beweisen / Als mit erma-  
nen/straffen/rahten/leeren/leihen/ ge-  
ben/zc. welches das Opffer der wolthat  
ist/

ist / von Christo zübelohnen verheissen  
Matth. 10. 25. Luc. 14. vnd 16.

Die dritten ware günnen werck / sein  
die so auff vns selbs gerichte sein / die  
werck der rechtgeschaffnen büß / Als  
rew vnd leid für die sund / die tödtung  
des alten Adams / mit allen lüsten vnd  
begirden / durch mäsigkeit / fasten / was  
chen vnd casteyen / vnd das heist Pau  
lus ein Spffer vnser leibs Rom. 12.

Nun setz oberzelte dreierley glau  
bens werck / des newen menschen / so  
durch die inwürckung im h. Geist ges  
chehen / belonet Gott auß verheissung  
seiner genaden vnd barmhertzigkeit /  
mit geistlichen gaben vnd ewigem le  
ben / dauon Matth. 5.

## Von den Wercken mensch licher gerechtigkeit.

**S** Je werck menschlicher gerechtig  
keit / so auch ein fromer Meid / das  
ist / ein weltmensch thun kan / der  
in se



In seinem hertzen vnerleucht / den was  
 ren hertzglauben nit geschmeckt noch  
 erfahren hat / vnd dannoch auß mitleis  
 den / oder was er zur vrsach nimpt welt  
 fromkeit zu üben / lieb vñ barmhertzig  
 keit dem nechsten zubeweisen / Solchs  
 will auch Gott nit vnbelohnet lassen /  
 aber Er belonet dise werck nit mit geist  
 lichen gaben vnd ewiger seligkeit / son  
 der wie es eusserliche werck sein / so nit  
 auß glauben geschehē / belonet sie Gott  
 auch mit eusserlicher zeitlicher wols  
 that / als glück / reichthum / gesundheit /  
 wolfart vnd deren gleichen. Wir aber  
 sollen billich trachten vñ streben /  
 nach warer Gottseligkeit / So zu  
 allen dingen nutz ist / vnd hat  
 die verheissung dises vñ  
 des zukünfftigen  
 lebens / i. Tim  
 moth. 4.



Vom

Vom gehorsame Gottes vñ  
 Wellicher Oberkeit so ein Christ zu  
 leisten schuldig vnd wie weit  
 sich ein jeder gehorsam  
 erstrecke.


Christlich lesen wir Matth. 22. Luc.  
 20. Das Christus auff die frag der  
 Juden (ob man dem Keyser zins/  
 oder schatzung geben solte oder nit) Al-  
 so geantwort habe/ man solle dem Ket-  
 ser geben/was des Keisers / vnd Gott  
 was Gottes sey. Darauß dann zwey-  
 ley Oberkeit Reich Regiment vnd ge-  
 horsam vermerckt würdt/ıc.

Nun den gehorsam Gottes belan-  
 gen / so ist Gott die höchste Oberkeit/  
 ein König aller König / vnd Herz  
 aller Herzen 1. Timoth. 6. Darumb  
 am höchsten zu fürchten. Als der Seel  
 vnd leib in die hell stürzen Kane Mat.  
 10. Mar. 12. Dem soll man dienen  
 mit forcht vnd zittern / vnd den Son  
 küssen das er nit zürne Psal. 2. Vnd  
bissen

114  
dissen Gott vñ Herzen lieben von ganzem hertzen / Seel / kressen vñnd gemüch Luc. 10. Matth. 22. Als der allein den glauben zu geben zu meren vñnd zu stercken. Das hertz von sünden zu reinigen / mit seinem heiligen Geist zu erleuchten. Die Seel zu begnadigen. Das gewissen zu befrieden / In den himmel zu nemen / oder in die helle zu stürzen hat / dann er jhe allen gewalt des himmels vñnd erden hat Matth. 28.

Darumb er von Gott dem Vatter gesetzt zu seiner rechten in den himmelischen ober alle Fürstenthum / gewalt / macht / herrschafft / vñnd alles was gesent mag werden / nit allein inn dieser welt / sonder auch in der zukünfftigen Ephe. 1. Deshalb er von Engelen / Königen vñnd Menschen / gepriesen / verehret vñnd angebetet werden solle.

Heb. 1. Psal. 72



# Vom gehorsame der Christi- sten gegen Ordentlich Oberkeit.

**W** Ir lesen zu den Römern am 12.  
Das jederman der Oberkeit vnd  
gewalt sol vnderthen sein/ als Got-  
tes Ordnung dann durch widerstreben  
der Ordnung Gottes/ we. de man ein  
schwer vrtheil vber sich empfangen.  
Darumb vermanet er/ so l vnd Steu-  
zügeben. Auch forcht vnd Ehre dem es  
gebüret / Also er manet auch der heilig  
Petrus die Christgläubigen / 1. Pet. 2.  
Aller Menschlichen Ordnung vmb  
Herren willen vnderthen zu sein/ Kö-  
nigen/ Obersten vnd Pflegern als den  
Gesanten zur rath der viel heter vn zu  
lob den wolhetern. Deßhalb so ist ein  
Christ schuldig Ordentlich Oberkeit  
zügehorsamen in all n dingen/ so Gott  
der höchsten Oberkeit nit zu wider  
seind / Dadurch Gott in seinem reich  
vnd Regiment/ Ehre vnd gebotten  
kein abbruch gesch. ch. / Als in zeitliche  
bibliche

leiblichen dingen / Leib hab vnd güt  
belangen / Welches dann in das welt-  
lich Regiment dises lebens gehöret /  
darin auch die Oberkeit nach gerech-  
tigkeit richten solle / wie dann geschrie-  
ben stat / habt gerechtigkeit lieb jr Res-  
genten vff erden Sap 1.

Die Oberkeit sol auch alle laster straf-  
fen Burgerlichen Friden / vnd güt Po-  
licey sampt Gemeinem nutz erl, alten / etc.

Was aber den glauben / hertz / Seel  
vnd gewissen belanget / das hat ihme  
Gott vorbehalten / als in sein reich ge-  
hörig / der allein hat Himel vnd hell /  
vor güt vnd böß / Welcher ding halb  
ein weltliche Oberkeit / Gott kein rech-  
enschafft thun / noch geben darff. Was  
aber (wie obgemelt) ihrem ampt zü-  
stendig / würde ohnerfordert nit blei-  
ben / vnd wa sie in solchem seumig vnd  
farlässig gewesen / schwerer straff von  
Gott gewertig sein müsse / Gott gebe  
aller Oberkeit ein sollich hertz vnd ges-  
müch wie Salomon / dauon wir lesen

3. Reg. 3. vnd Sap. 9. Welcher vnder  
 allem erwölet ein gehorsam hertz vers  
 standt vnd weißheit von Gott sein  
 Volck zü richten/2c.

## Von der letzten gferlichen irrigen bösen zeit.

**W**Ir sein jetz (meines erachtens) in  
 der Letzten zeit/ von welcher die  
 h. Schrifft zeuget/dz sie vil vbels  
 (den menschen an Seel vnd leib schäd  
 lich) mit bringen werde/ Darumb allen  
 denen/ so der Seeligkeit begeren/nach  
 sein will inn ihrem gebett gegen Gott/  
 anzuhalten vnd wacker zü sein/ Vff  
 das sie durch den Sathanam/vnd sein  
 ne glider/nit in verderben vnd ewigen  
 schaden bracht vnd verführet/ Sonder  
 durch Christum an Seel vnd leib er  
 halten werden mögen.

Dann Erstlich sagt Christus das  
 vil falscher Propheten/ vil irrthum  
 werden verführen/ Das der Irthum  
 werde so krefftig sein/das auch die auß  
 erwöleten

serwölten (wann es möglich were) ont  
 verlegt/ nit dauon möchten Matt 24.  
 So werden die Leut sich von der war-  
 heit zu den Sabeln keren/ vnnnd ihnen  
 selbs nach ihren ohren kugel prediger  
 wöhlen 2. Tim 4. Etliche werden den  
 verfürischen geystern vnnnd Leeren der  
 Teuffel anhangen 1. Timoch. 4. Vnd  
 werden die Leuth inn der letzten zeit  
 verüchter böshafftiger art sein / Als  
 Paulus der heilig Apostel dauon  
 schreibt 1. Timoch. 3. Vnnnd spricht/  
 Es werden menschen sein/die von inen  
 selbs halten. Geizig/stolz/hoffertig/  
 Lesterey / den Eltern vngheorsam/  
 vndanckbar/vngeistlich/vnfreundlich  
 widerspennig / Schender / vnkeusch/  
 die kein lieb zum güten haben/wild/  
 verächter / Freueler / auffgeblosen.  
 Die mehr lieben den wollust / Dann  
 Gott sampt anderen vntugendē mehr/  
 im selbigen Capitel verzeichnet/ 2c.

So bedenc̄ nun ein jeder hie ob nit

J 9

der baum völlig proß vnd außschlage  
 Matth. 24. Ja sich auch in fruchten er-  
 zeige/dabey das ende der welt/vnd die  
 zukunfft des letzten gerichtis/so endlich  
 durch Christum den Son Gottes soll  
 gehalten werden/sich herzu nahe/vnd  
 nit weit mehr zum ziel sey / Doch das  
 jar/monat / woch / oder tage/Gott zu  
 wissen vorbehalte/ Es sagt auch Chris-  
 tus Matth. 24. Nach dem die liebe in  
 vilen erkaltet / werde die vngerechtig-  
 keit überhand nemen/vnd werden sich  
 vil ergeren / einander verrathen vnd  
 hassen.

Da betrachte man nun das gemein  
 leben der jezigen welt/in allen stenden/  
 ob im nit jez also sey/ vnd täglich mehr  
 wirt/dauon die welt jr selbs weiß saget  
 vnd spricht: Es künde nit lang beston/  
 es müsse entweder enderung oder ende  
 kōmen / denn alle stend seind auß ihrer  
 ordnung getreten/vnd treibt (durch  
 pracht vnd hochmüt) jhe einer den an-  
 dern außs höchst.

Daher



Daher erwecket die vilfaltig finans  
 berey/vntrew vnd wücher hendel/vnd  
 tracht jederman nach Kauffmanschaft/  
 dem müßigang/pracht vnd höfflicheit  
 genüg zuehün / So wirt bey jertziger  
 welt für ein wolstandt gerechnet / das  
 erwan sünd vnd schand gewesen/vnd  
 genent worden/allen lastern setzt man  
 jetz ein hütlin auff/ sie mit höffliche ver=  
 deckten namen/ vñ nit nach irer gebüre  
 zü nennen/ Das alterbar leben/vñ euf=  
 serliche welt fromkeit / leit gar zü bo=  
 den/vñ die ware fromkeit/die für Gott  
 gilt/ begert niemand zü erfahren/ noch  
 zü erkundigen / ich geschweig in besitz  
 zü bringen/ mit Christenlichem leben  
 zü beweisen / Ja es ist der jertzigen welt  
 langweilig vnd verdrußlich vil dauon  
 zü hören.

In summa/es ist alles verderbt vnd  
 verwüst/vnd so gar/das bey nahe alle  
 hoffnung der büß vnd besserung dahin  
 ist / Es wolt ihme denn Gott ein newe  
 welt schaffen/ dabey wol abzünemen/

J iij

Das nit weit zum ende sey / daruñ Chri-  
 stus sagt Luc. 18. Meinste du wenn des  
 Menschen Son kommen wirt / ob Er  
 auch glauben findē werde auff erden /  
 Vnd Luc 21. spricht Christus: Hütes  
 euch / das ewre hertzen nit beschwerdt  
 werden / mit fressen vñ sauffen / vñ sorg  
 der narung / vnd kome diser tag schnell-  
 le über euch / Dabey abermals anzeigt  
 wirt / das fressen vnd sauffen / vnd sorg  
 für zeitlich narung / für dem ende der  
 welt / ganz genglich sein werde / wie  
 (Gott erbarmt) jezund allenthalben  
 öffentlich vor augen.

Dieweil nun in heiliger Schrifft  
 genügsam erfundē wirt / das die so der  
 seligkeit begeren / glaubens / lebens vnd  
 wandels halb / einē vndercheid für an-  
 deren welt menschen (vnd ein bessere ge-  
 rechtigkeit dann die Schrifftgelerten  
 vnd Phariseer an ihnen) haben sollen /  
 Deshalb der Heilig Paulus erma-  
 net: Nit diser Welt gleichförmig zu  
 leben Rom. 12. Nit ziehen am fremb-  
 den

Den soch der vngleubigen 2. Cor. 6. Die  
 werck der finsternus abzulegen Rom. 13.  
 Nit fleischlich gesinet sein / welches der  
 tod / vnd ein feindschafft wider Gott  
 sey Rom 8. Vñ Gott durch den munde  
 des Propheten spricht: Wir sollen vns  
 wäschē vnd reinigen / das böß von sei-  
 nen augen hinweg thun Esaie 1. Den  
 alten Saurteig außfegen 1. Cor. 5. Was-  
 cker vñ nüchtern sein 1. Pet 5. Mit dem  
 harnisch Gottes gewapnet / den listi-  
 gen anleuffen des Satans zu wider-  
 stohn Ephe. 6. Barmherzig sein / nit  
 richten noch verdammen / gern verzei-  
 hen / gern leihen / auch den feinden güt  
 thun Luc. 6. Darumb der glaub nit  
 jedermans ding ist 2. Thess. 3. Wiewol  
 jederman Christen sein will / one bewei-  
 sung der frucht / Es spricht aber Gott  
 also: Bin ich ewer Vatter / wa ist denn  
 mein ehr / die ihr mir gebt Malach. 1.  
 Item / Was heissen ihr mich Herr / vnd  
 thun nit was ich euch sag Luc. 6.

Dann die Gott fürchten vnd recht  
 thun / sein ihm angenehm Acto. 10. Die

J üij

Gott lieben/halten sein gebott Joh. 14.  
 Vnd welche thun was er gebent/ seind  
 seine freund Johan. 15. Zu den büßfer-  
 tigen nähert sich dz reich Gottes Mat. 3.  
 Die newgeborenen auß Gott Johā. 1. 30.  
 Vnd die der Geist Gottes treibt/ seind  
 seine kinder Rom. 8. Die glaubig seind/  
 werdē selig Mar. 16. Die sich selbs ver-  
 leugnen/ jr creuz auff sich nemen/ Chris-  
 sto nachfolgē/ seind seine Junger Luc.  
 14. Die wirt man an der lieb erkennen  
 Johan. 13.

Darumb auß dem hie obgemelt wol  
 zu ersehen ist/ das die Christen /glau-  
 bens vñ lebens halb/ von den welt kind-  
 dern vnderscheidē sein sollen/ Vñ wirt  
 dannoch der gerecht kaum erhalten/  
 wa will denn der gottloß vñnd sünd-  
 er bleiben 1. Pet. 4.

Deshalb will vns vnd allen denen/  
 so der seligkeit begeren/ hoch von nöten  
 sein / mit embsigem gebet bey Gott an-  
 zühaltē/ vñ ware erkantnis vnserer  
 sünd/ vnd das wir vns durch büß vnd  
 besse-

bessening vnser lebens / von hertzen /  
 mit seel / leib vnd aller zugehör an Gott  
 ergeben / allein in vnd bey jme / artzney  
 der seelen / hilff / trost / heil vnd seligkeit  
 süchen / Das Er vns zu allen Christen  
 lichen tugenden vnd güten wercken /  
 durch sein genad vnd geist tüchtig ma-  
 che / vnser hertzen erleucht / widergebes-  
 re / in seinen gehorsam bring vñ warer  
 lieb anzunde / auch alles das auß vnse-  
 ren hertzen / sinn vnd gemüt hinneme /  
 das jme an vns mißfellig ist / Vnd das  
 er selbs in vnere hertzen pflanze / was  
 jhme gefellig / zu seinem lob vnd preis /  
 auch vnserem heil fürderlich vñ dienst-  
 lich sein möge / inen allezeit in warheit  
 vnserer hertzen Vatter zu nennen / Das  
 mit sein heiliger göttlicher name / alles  
 zeit durch vns geheiligt werde / Vñ zu  
 vns kome / sein heiligs göttlichs Reich /  
 das Er durch seinen h. Geist verwalt-  
 tet / vnd das reich der sünden vnd diser  
 welt / in vnd bey vns verstöret / außges-  
 tilget vnd zu boden getruckt werde /  
 Das sein göttlicher wil / durch sein götz

J v


liche krafft vnd genad / bey vns armen  
 sündern / alzeit hie vff erdē gschehe / wie  
 durch seine heilige Engel im himmel /  
 vnd wir vns von hertzen / bestendigkli-  
 chen seinem göttlichen willen / zu allen  
 zeiten vñ in allen dingen vndergeben /  
 Damit wir an vnseren armen Seelen /  
 mit dem heiligen leib vñ theuren blüt /  
 seines lieben Sons vnser Herrn Jesu  
 Christi / warhafftiglich gespeiset vnd  
 getrencket werden / Vnd vns / von we-  
 gen seines heiligen bitteren leidens vnd  
 sterbens / all vnser sünd vnd missethat  
 gnediglich verzeihen werde / Das wir  
 in keiner versüchung oder anfechtung /  
 nimmermehr zu boden gohn / sonder  
 durch sein göttlich krafft vnd genad /  
 allzeit sigend / überwinden / mit hert-  
 zlichen freuden auffstou / Vnd durch in  
 vnseren trewen lieben Gott Herrn vnd  
 Vater / von allem bösen / so ime an vns  
 misfellig ist / gnediglich erlöset wer-  
 den / Das Er vns laß zukommen / was  
 vns zu im dē waren Got / fürderen vnd  
 bringen möge / Er aber wölle vnserer  
 hertzen

herzen krafft vnd sterck/ ewigklich sein  
 vnd bleiben/ dieweil wir arme glider  
 vnd zweige/ ohn ihn das haupt vnd  
 waren Weinstock/ nichts güts vermö-  
 gen/ Damit wir zu seinem Reich bes-  
 krefftiger vnd gestercket/ die ewig herzs-  
 lichkeit durch ihn erwerben/ mit allen  
 rechtgleubigen erlangen / vnd nach  
 disem leben ewigklich besitzen mögen/  
 Amen.

Hiermit will ich zum preis vnd  
 ehren Christi/ meinen glauben/ von des  
 wegen ich nun zu mehrmalen bin für  
 geforderet / angefochten/ auch meiner  
 dienst entsetzt vnd abgetriben worden/  
 vffs trewlichst nach Christenlicher ein-  
 salt dargethon/ vnd für menigklich bes-  
 kantt haben / Vnd wiewolich in mei-  
 nem herzen vnd gewissen/ dises jertz bes-  
 kanten grunds der Seligwerdunge/ in  
 keinem zweifel stehe/ jedoch wa ich von  
 jemandt bessers grunds / mit heiliger  
 Schrift berichtet würde/ wolte ich das  
 selbig in keinen weg abgeschlagen/ son-  
 der


der mit gebürlicher danckbarkeit anzunehmen mich beflissen / Sonst steht vnd ist mein fürnemen / bey disem bekanten grund / mit Gottes hilff vnd gnaden / bis zu ende meines lebens / vnd gütter hoffnung der seligkeit / zu bleiben vnd zu beharren. Mich hiemit dem fleissigen andechtigen gebett / aller waren Christen / bittlich eingeschlossen / vnd vns alle samptlich / dem gnedigen schirm Gottes außs trewlichst befolhen haben.
















10 14

46  $\frac{19}{1,3}$


AB 46  $\frac{19}{1,3}$

X 2199882  
56









**Bekantnus Christ**  
 lich glaubens / Bernharten  
 Herzheimers / Abgesetzten Pfardieners  
 vnd schülmeisters / Christo Jesu dem Hers  
 ren der herlichkeit zum preiß vnd ehren bes  
 kenneet / Vnd den einfaltigen gotliebenden  
 Christen / so vnderricht bedürffen / süchen /  
 begeren / vnd bessern nit wissen / zum bes  
 richt vnd vnderweisung Christlichs glaus  
 bens vnd lebens / hie trewlich außgezeich  
 net / gemeret / freuntlich mitgetheilet /  
 vnd auff ein frey vrtheil aller  
 göttsgelehrten gestellet.

i. Thess. v.

Den geist löschend nit auß / die Pros  
 phecey verachtend nicht / Prüfend  
 aber alles / vnd das gut behaltend.

